

曾文正公書札

曾文正公書札卷二十一

致羅澹邨中丞

頃接湖南咨文蕭浚川一軍因貴州撫軍奏后達開已入黔境連營二百里諭旨恐其入蜀飭蕭公追剿石逆一股駱中丞因令赴黔蜀之交迎剿此軍自是不能東來矣小池驛三軍與賊大戰互有勝負計年內尙有幾次惡戰太湖城外萬人宿松四千人皆作援應之師以備意外之虞珂鄉耆舊可出而相助者便中望開單示及爲荷

覆胡宮保

廿二日之戰多營傷亡六百餘鮑營傷亡五百餘蔣營傷亡三

百餘人馬隊西哈兩營總陳亡皆好手也賊鋒甚銳毛匪之陳  
玉成擒匪之宮晴子皆江北著名兩悍賊楚軍入皖多鮑之害  
戰閣下之威名人數之多虛聲之遠皆所以怠我而怒寇鄙意  
欲令前敵諸軍堅壁勿戰稍稍冷賊之凶燄而滅其銳氣恐言  
之不見信尙未函商也閣下如以爲然可否函告多鮑諸公我  
軍不必去撲賊營待賊來撲我堅忍不出直至日暮人倦然後  
擊其情歸或有當乎如能從此計敝處當再派二千人紮於小  
池驛之東南與鮑蔣二軍作倒品字形以保其後路也若多鮑  
急於求戰則此閒不敢再派人去恐營壘未定日日接仗無益  
而反有損耳

覆李次青

貴邑忠義祠俟詳文到日卽當具奏列入祀典沛先歆後有自  
來矣國藩自冬月十三移師皖境駐紮宿松卽聞四眼狗上援  
之耗臘月中旬狗逆果遂西來竄有悍賊五萬餘人日內萬分  
吃緊蕭浚川奉 旨追剿石逆當有入蜀之行凱章亦乞假未  
來就現在之營派六千人進圍太湖爲前敵多飽諸軍之聲援  
自率四千人者駐紮宿松竄乏得力之將稱意之營胡潤帥駐  
軍英山亦以希菴假歸尙無統將羅澹村中丞請閣下赴浙亦  
有一賊來商國藩答以代爲催促不敢必其果往今閣下慨然  
有意東游應請速卽命駕或單車之官或板輿偕往或取徑義

甯卽赴河口或買舟大江經過敝營并祈示悉溫嶠絕裾君子  
或譏其忍毛義捧檄仁者必亮其心固不嗟然也宿松去湖口  
百里去武穴隆平百三十里如其揚舲東下枉過敝營亦不甚  
遠或更迂道英山一訪潤帥亦足大慰彼此飢渴之誠何如

### 覆唐義渠

貴軍以距法華寺太遠不能分紮正東鮑軍舊壘則城賊偷出  
夾擊荊鮑兩軍乃意中必有之事可慮之至胡中丞札蔣軍移  
駐小池驛一帶頃接鮑公信言蔣不願移此時以救全鮑軍爲  
第一要著鄙意由宿松再派二千五百人赴太填紮閣下現在  
北門營壘請閣下率全軍七營進駐小池駱龍家涼亭之間與

鮑軍作品字形鮑蔣面向潛山貴軍面向太湖專禦城內之賊打仗之時賊不得抄鮑之尾諺所謂靠背打也如此庶可保全前敵三軍如閣下欣然行之則此間各營初二日拔行初三早到太湖貴軍卽於初三日拔赴小池驛想閣下新練勁旅必可立奏大勦矣

致駱備門中丞

太湖多鮑蔣三軍於臘月十六移駐小池驛龍家涼亭等處二十三日之仗我軍先大勝而後小挫傷亡共約千三百人二十六日賊圍鮑之左營二十八九則五營用大包裹文報不通已三日矣多營在新舊隔二十餘里蔣營隔七里皆以力薄不能

收應危急之至倣處雖有萬人多新立之營又無統領兩次共撥八千六百人進紮太湖僅能圍賊之半城兼以顧鄂之邊界不能援應前敵亦不能遏城賊之東出也萬一前敵有失大局不堪設想茲特飛告敬求閣下於浚川凱章二軍催一來鄂浚川將入蜀中凱章假期未滿明知俱難應手惟求閣下設法遣一軍來雖不能救潛太之急但能抵漢黃爲救敗之著則兩湖之幸也

覆胡宮保

公派二十營從高橫嶺山內打出可收內外夾攻之效但水吼嶺等處易進難退須由迤西迤北斜出庶易通小池驛之氣

二十九日蔣營出隊雖不甚分勝負然賊亦略弛鮑軍之圍鮑之左營得趁此機以運進水米子藥可云至幸然已被圍四日矣多公派精選前營往換靈左營不知果已換出否靈左營營官爲誰援賊果卻必求我公以生龍活虎之筆超保之鮑鎮亦須特保

舍弟請赴太湖待昨夜已允許矣蓋因太湖近九千人若另有一人坐鎮則朱品隆可帶隊助前敵也今公既派萬人來助小池驛則太湖一軍可安坐不動舍弟可無庸赴太湖矣

致鮑春霆

肅以德歸備述前敵形勢寸心少慰來臧所陳一切當卽批復



聞四眼狗性情輕躁不能耐久我軍宜以堅忍勝之四眼狗糾集擒匪而來擒匪向來不服長毛約束其交可暫而不可久此時貴軍但求穩固不求奇功如能堅持半月二旬外必破賊矣

覆胡宮保

初六之役唐軍又挫鄙意此次變之陳玉成李壽成擒之宮張四凶同來諸將才力氣魄皆不足以勝之總須穩紮堅守爲安金余一軍宜負山以自固不宜全出嶺外有舒公馬隊則可以出平原伏祈採擇施行

與李申夫

抽隊出赴前敵打行仗之法三千人營中抽出六成約千八百

人分寄鮑蔣兩壘之中蔣軍八牆可寄千二百人鮑軍中前有  
三牆可寄六百人或盡寄蔣軍牆中亦可遇開仗時我千八百  
人單打一路蔣軍牆內添鍋帳而不另築牆子請蔣之長夫代  
我軍煮飯我只送米價菜價與他不必另帶長夫也下半日去  
燈時至蔣營次日停住一日第三日晨飯後歸下半日又另派  
千八百人去第四日停住一日第五日晨飯後歸如是輪流率  
以爲常遇打仗時則隨同打仗不遇開仗則閑往閑歸聊代哨  
探既可援助前敵又可使我軍學習戰事免致猝遇大敵忙然  
無措也

與李申夫

昨日批朱總兵稟三策一策抽隊寄住蔣營打行仗一策紫東門一策抽隊出東北羅溪河馬齒嶺等處迎接山內金余之師除紫東門一策難行外其寄蔣營打行仗之策以必行爲妙其迎接金余之策縱不能行亦須多派妥人往通消息高連勝等往小池驛哨探甚好可令順字營百五十騎并湘前強中嘉營五十騎常常哨探此路實有大益

致凌問樵

聞貴營今已移紫羅溪河前在宿松近在太湖貴營壕牆皆備極辛勤高出各營之上茲又移一處勇夫過於勞苦實可憐念茲發去錢四十千以備雇民夫幫工之用羅溪聞在太湖河東

與太湖各軍有一水之隔該處三營究竟站得住否此外倘有他處有險可扼距護軍稍近者否祈查明詳復

與胡宮保

侍憲此時各軍皆以穩字為主多鮑唐蔣穩金余穩太湖穩自有足以勝賊之理髮捻相合其交斷不能久一月以後可以掎角此寇矣公謂何如

致金逸亭

前敵鮑軍雖望閣下之救甚切然糧路尙通士氣尙固閣下行軍總望以穩字爲主先通羅溪河一軍及太湖各軍之氣然後向小池驛一水進紮步步逼近待賊來撲我我乃起而應之最

有把握若我去撲賊主客異勢恐難得手至蔣畱欲分一軍紮水吼嶺弟意以爲不可分又欲閣下軍出羅溪河等處弟意以爲不如紮高橫嶺去鮑軍較近也

再捲塘進紮之法如第一日將二十營同紮一處必有數營在前者數營在後者第二日進紮卽以昨日之後五營進移於前四五里其餘十五營不動第三日又以昨日之後五營進移於前四五里其餘十五營不動以次倒換而進則無移營之迹無一面築壘一面開仗之勞以次偏近王家牌樓銀硃塔等處小池驛之賊必來撲營賊爲客而我爲主乃易得手是否有當乞酌擇施行

覆胡宮保

十一日金軍獲勝後羅溪實已無虞山內一軍其妙無窮腦後一鍼而痛皆除但此後仍當以穩字爲主不可過求速效金余已得過勢斷無不破賊之理第不可疏耳趙朱仍請紮太湖俾朱品隆等得以放心久駐新倉助打行仗

致胡宮保

宿松派打行仗之三營昨日可抵新倉太湖朱品隆等四營今日可抵新倉計一二日可見仗矣此間議者有急戰緩戰二策請陳左右擇一而行之

一急戰策山外山內各軍逐日進攻使賊腹背受敵應接不暇

太湖官軍亦出隊攻城使城賊不敢悉出以赴前敵

一緩戰策山外四軍但積糧固壘爲自守計山內諸軍步步偪  
紮卻不尋賊開仗太湖四面高山僅西南一口出水於此口築  
壩長不過里許高不過四丈久不過一月則積水三丈全城皆  
淹沒矣二月以後城賊援賊必日夜求與我戰我卻固守偏不  
與之戰此策果行援賊縱不大破城賊必無漏網

右二策鄙意自下急戰五日用前策過五日而援賊不退卽用  
後策可否敬求詳示

覆毛寄雲

弟自冬月駐軍黃梅進紮宿松臘月中旬逆酋四眼狗糾合捻

首當瞎子悉力上犯前敵多鮑將三軍進紫太湖前四十里之  
小池驛禦之於門外弟撥六千人會合唐義渠軍仍圍太城賊  
多數倍於我以大圍包裹鮑軍弟續撥二千七百人進圍太城  
抽出義渠一軍並赴小池驛初六之戰義渠挫衄三營被陷鮑  
軍復被圍緊急潤帥派金逸亭余會亭從水吼嶺山內打出十  
一日大獲勝仗鮑軍從此少鬆弟又添派二千五百人往打行  
仗曰內必有數大惡戰不知能大挫凶鋒否較之臘底正初之  
危迫萬狀此時業已化險爲平矣潤帥駐紫英山雖相隔二百  
六十里而呼吸相通意見相合足慰綺注袁午帥自權兵符甚  
爲得手臨淮關業經克復鳳陽懷遠亦可卽克髮捻交集此閒



下游逆黨較少韋志俊投誠後池州又被楊賊攻陷韋逆敗殘之餘不能有爲長矛手五十人求迅速送來爲感

### 覆金逸亭

接來緘知雄師將進紫紅土山迤西一帶甚喜甚慰貴軍步步進逼與小池鮑軍僅隔十里則該逆夾在中閒如湯沸鼎如芒在背必難站腳貴軍距天堂暫遠必宜與羅溪河太湖常通聲息萬一子藥缺乏尙可由太湖借撥羅溪河之阿達春李續壽太湖之趙克彰朱品隆李申甫及舍弟等皆與閣下至好愈通信多則愈好辦事也

### 覆金逸亭

明宮保之意欲貴營不必再進取白洋嶺居高臨下之勢鄙意  
仍宜進紅長山等處恐出隊太遠賊逆我勞難於得手也至進  
紅長山後糧運之路不至被賊隔斷否子藥尙充足否便中乞  
示及

### 覆胡宮保

手教摺片各稿讀過此次於鮑之堅忍處平平敘去不過烘託  
亦好蓋近日各統領專看摺奏中出語之輕重以權其效力之  
多寡往往正在酣戰之際忽見一摺敘事不甚如意遂廢然不  
肯向前者有之此摺若不保人或再緩數日始發亦好如此兩  
等似正月尙不能開大仗者粵捻之交不能久固緩戰亦我之

利也

與劉養素

弟不勸閣下出境戰賊非弟之過怯亦非恐貴部不甚精勁也  
特以皖南之賊窮無所歸未嘗不窺伺江西閣下屏蔽東北必  
須日日操演練成勁旅其有險可守之處仍須造立礮卡以佐  
兵力之所不及萬一賊犯江境以閣下之全力而濟以饒鎮浮  
梁之師戰縱不足守則有餘使業經肅清之江西不復爲寇氛  
所偪亦不枉閣下六七年辛苦戰爭耳

覆胡宮保

手教敬悉伍君圖說閱過此人前後兩次圖說俱切實無浮詞

有用才也大關侍曾經過雖居山中而頗散漫非一萬勁旅不能扼紫青草壩則潛桐懷三縣之總匯援賊退後一面合圍太湖一面卽進扼青草壩矣賊亦頗注重該處不知須多少兵始扼得住也俟查明熟商

### 覆金逸亭

潤之宮保抄示閣下十八夜傳單具仰進止有法疾徐合度至以爲佩惟聞廣福寨在東羅山冲在西閣下若打開東路先清廣福寨一帶則西頭之賊已無歸路將羣賊兜入大圈之內彼不拚命死戰則必四出亂竄辦理反難得手弟前固知山外諸軍自上打下從羅山冲入手茲欲留東頭爲賊之歸路也山內

貴軍及余軍是否可從上打下先打羅山冲後打廣福寨之處  
伏祈查示至羅山冲果否在上在西廣福寨果否在下在東賊  
之敗路果否應在東頭均祈查明詳示春天晴雨無定必待日  
高四五丈乃看得准號礮洗三排鎗似不宜太早也

### 覆金逸亭

接惠緘得悉昌禮各營小挫情形以地圖觀之高橫嶺在上在  
西昌軍應在貴軍之右而來緘稱昌軍爲左路何也目下賊之  
大隊聚於羅山冲一帶弟昨夜一緘勸閣下從西頭下手莫從  
東頭下手者蓋東頭若勝賊之歸路一斷拚命衝突我軍受傷  
必多若東路不勝則西頭愈形喫重可否請閣下湘軍合昌禮

桂等軍併趨西頭先擊羅山沖之處候卓裁商復山外新倉之  
唐朱三軍去羅山沖二十五里去小池驛二十里與山內約  
期極難可否俟三軍接仗以後貴軍再行出隊之處亦候卓裁  
商定蓋貴軍所易於望見者寔營也寔營偏近悍賊不能遠赴  
西路羅山沖一帶其能赴西路羅山沖與閣下夾擊者多蔣唐  
朱軍也四公相隔太遠約期恐致參差故鄙意不願閣下分攻  
東頭而願湘軍與昌軍併力西頭不願閣下聞洗鎗三排而遽  
出而願俟多蔣各軍至羅山沖口外貴軍乃出而應之也

與凌問樵

羅溪五營近日牆濠俱已修成否極高深可恃否聞李璞階營

後一山已立望樓似不如紮一哨於山上乃能穩靠望與璞階切實言之聞十九日余際昌軍小挫賊或分支來犯羅溪亦未可知然叢山僻徑無處安營大股必不能來貴軍及阿李各軍止宜堅守營壘以靜待動不宜出隊迎擊恐僻路曲徑或有伏賊也其團練一營亦告之不宜出隊迎擊

### 致胡宮保

十九日余軍之挫不知尙可自振否若傷亡過多刻難自立止可令山外山內各軍一概休養專待賊來撲我決不先去尋賊卽以近事言之臘月廿二正月初六十九日三次之挫皆我去尋賊惟十一日係賊來撲我主客勝負之數了然甚明竟可用

公牘私函切止各軍不再先出尋賊致人而不致於人如余際  
昌軍傷亡尙少元氣未損則聽各統領自進自止吾輩不必遙  
制也羅溪河似可不必添兵亦實苦無兵可添舒公馬隊粘置  
羅溪萬山之中豪無用處若置金余附近或可少裨益然亦  
謂舊馬隊耳新者則未必得力霍山五營如果調回亦止可駐  
五柯楓等處一以援應天堂一以屏蔽英山調向東來則西北  
太空決不可也

覆胡宮保

手教張子衡李續燾二人之言與朱品隆所抄述投誠之賊供  
相同侍意賊若不破金余二軍不破羅溪一軍決不能冒險上



竄惟羅溪一軍散漫無統若賊至則恐人各一議殊難放心就  
凌羅阿李程五人言之智勇閱歷自以凌爲最優鄙意欲會白  
銜派凌爲羅溪河一軍統領如以爲可卽求導處王稿飛札

與朱雲岩

官兵必須從上打下正恐賊分竄太湖後旋又上竄鄂疆也余  
有兩信與金逸亭亦勸其自上打下已抄稿寄蔣之純兄矣賊  
既專爭曰四時我官軍出隊亦不可早余前批該統領稟亦言  
須爭下半日也聞余際昌軍十九日小挫究竟傷亡若干人失  
軍器若干多公親率馬隊去金營幫其收隊曾見昌營挫失否  
多公與金營中隔廣福寨下賊壘數里不知馬隊何以能過多

公之賢余已深知之矣自去歲臘尾至今年正月幾無日不親至鮑營其馬隊及精選營幾無日不出隊以此知其待人之厚又於宿松城中多部下受傷者詢問以此知其得士之心

覆李璞階

接來緘并地圖熊家寨立望台極爲得力鄙意欲貴營分紮一哨於寨頂之上更得勢也振字營凌丞是一好手凡事勤慎閣下可與之熟商必能同心協力共奏功績聞賊匪有上竄之意深山僻徑決不能容多人如果賊竄山內貴營及凌阿各軍均不必遠出迎擊待其將過盡時出隊截擊其尾可大勝也聞足不欲洩三河之憤望從勤慎二字用功

與李申夫

賊勢趨重上游或以大股來撲太湖官軍營盤切不可賊不甚多遂存輕視之意以後城賊若出我軍切莫出隊迎擊惟靜守營壘以觀其變待他過河圍我營盤日暮倦歸然後出隊微追如天色尚早賊僞遁尚不可追也

與李申夫

攻城極無把握樸勇者緊偏城根往往被火藥燒傷浮滑者並未近城自欺欺人徒傷樸者故余不肯爲也太湖各軍士氣尚旺余之所慮者太湖羅溪兩軍不能禦賊之分股來撲耳如太湖羅溪兩軍足以自立則多鮑金余諸公必可打破援賊如賊

分萬人來撲太湖我兩軍堅守一二日屹然不動則多鮑金余  
尤必大破援賊此必然之理必然之勢也目下大局以太湖羅  
溪爲守兵以多鮑金余等軍爲戰兵守者遇有大警信時不須  
戰者來救則戰者必奏大功矣

### 覆胡宮保

賊曰曰移營傍山而上去太湖止二十餘里下游白沙畝以下  
已無賊多蔣諸公慮其內竄定計今日移四營截賊之首橫驛  
路而紮之明日再移四營并精選四營往紮大約今日必開大  
仗又苦爲賊所致而不能致賊不知可得手否侍竟日旁皇不  
安足以見膽之薄矣吳幹臣五營似不能不調如果得手飛札

止之可也

覆凌問樵

團紳程君移紮過河不與貴營偪處亦是好事若使團勇扼紮要地賊來亦殊不放心也舒都護馬隊已至大湖河等處足資聯絡山僻之中大股賊必不能來堅守營壘預爲三五日被圍之計必可萬全問李璞階辦事亦極認真不知阿參將營濠高深否

覆金逸亭

惠緘知敝處之信業經接到兩地不謀而合殊爲快意山外多鮑諸公因賊營日日上紮恐其內竄建疆已定派蔣軍四營紮

於賊之上面想今日必開大仗不知昨夕約訂貴軍否多公十九日曾率馬隊親赴尊處是下面尚有路徑可通曰內尊處與山外通信或不須更由太湖乎約期打仗最難到恰好地位且有因而誤事者閣下若與山外訂約仍須說明各打各的可進則進應收則收免致彼此牽制或有疏失也

覆張廉卿

接到手緘未卽裁復薑塢先生筆記余未見其書其與鄙論相合者如何急思一觀便中尙乞寄示足下近所纂著縱不稱意亦望寄示一二國藩近狀猶遣自十二月中旬旬逆酋陳玉成率眾上犯奇險萬狀日夕籌慮不特書史莫親抑且寢食欲廢官

軍三萬餘人不爲不厚不爲不勁而賊尙欲倍之日內當有大戰數次未審能大挫凶鋒否

### 覆金逸亭

山外各軍俟貴處移西紮定後再行開仗本爲穩著惟多公定計攔頭截紮想昨日已開大仗矣山外四軍加以雲崖七營兵力實已不薄國藩未便囑其緩戰進止遲速聽多公主之可也山外開仗時尊處登高瞭望或探馬四出必可得其大概當山外酣戰之際尊處出隊夾擊雖未刻尙可出隊進退伸縮由閣下自己作主遠勝於約期會剿也

### 覆李希楚

接元夕惠緘敬悉姻伯母漸臻痊愈旌從擬於二十二日起行  
來皖至以爲慰此間軍事新正六日唐義渠訓營一挫被賊攻  
陷三壘鮑軍五營復被圍擾十一日山內金余兩軍破王家牌  
樓之賊山外賊勢稍鬆十九日山內余軍小挫一次賊日進  
紮與太湖漸近並不畏官軍之截其歸路聲言直犯湖北上游  
俾官軍回救二十五日山外多都統及唐蔣等營獲一勝仗計  
日內當有數大惡戰金陵大營因狗賊率悍黨上援下游攻破  
江浦及九洲營壘四眼狗必率眾回援金陵浚川廉昉及閣  
下皆來山內山外諸軍均得名將主持意江淮可望底定乎

與李竹屋



弟自客秋由江入鄂征蜀之役易而圖皖冬月與胡潤帥分道東下潤帥駐英山弟駐宿松臘月中旬逆酋四眼狗陳玉成率粵匪捻匪十餘萬上犯我軍多都統鮑總鎮等禦之於小池驛前敵凡萬八千人又圍太湖城者萬人從潛山以拊賊背者萬人兵力頗厚尙不逮賊之半幸昨日兩次大勝踏賊營六十餘座克復太湖凶鋒大挫皖事或尙可圖知荷塵注聊布一二

### 覆胡宮保

二十五日之捷殺悍賊實爲不少故二十六日之大捷不甚費力聞昨日大火焱焱極爲壯觀狗黨之資糧衣物軍火一炬燬土頗足一快聞金陵之江浦九洑洲皆已克復希菴浚川皆將

北來意者皖事其果可圖乎侍師公之法亦不奏事所有謝年終賞福字荷包摺欲附尊處月摺差弁帶去本月已趕不上二月又嫌太晚如何此外有便乎尊處謝摺當已發矣

覆胡宮保

頃接太湖信潛山已克復矣多蔣跟蹤追剿想可直達桐城行仗七營已分別回太宿二老營唐公奉多公令駐新倉勿進追鮑軍傷者較多不審能猛進否又不知其歸蜀之志堅欲必遂否應俟渠私計定後而後大局公計乃可決也看來四路之說竟辦不到止好暫置廬州於不顧而專剿舒桐安慶三處或尙可爲公居桐城兼控三路侍仍濱江藉以藏拙樅陽之師須以

舟載陸兵越安慶而下百里以襲樅陽朱雲崖現尙未能也

### 覆胡宮保

春霆請假公與侍皆先許之矣似不宜食言惟囑其不可久留川中迎其老母眷口出峽或住荊州或住漢黃准其團聚兩月有奇往返符百二十日之約但不在川以免奏聞耳添營一節亦懇允准以風壯士義渠實缺近在咫尺思一到任情也公既心許之請卽速行之渠爲統領亦實非上選也其訓勇七營中聞多精壯之士或謂宜全數撥歸鮑部鄙意勇以親手召募者爲佳似可一面令訓營撤散一面令霆營招選仍令春霆酌用訓營之豪強者爲營哨官移花接果當可兩得其宜是否所酌

之進兵能三路並進乃得勢今多鮑請假休養斷不能三路進  
可否以金余吳三公指桐城以蔣軍及朱雲崖赴安慶兩道並  
進如有緩急多公可就近速援是否請裁示

意此次之制實得未曾有也目下多公請假養傷鮑公請假省  
親希菴與舍弟沅甫未來浚川一軍官駱諸節奏令人蜀朝  
廷亦倚渠軍以弭蜀亂不克乘狗逆踉蹌之際進規安慶廬州  
頗爲失策事會所值疾徐有不克自主者所從來久矣

覆胡宮保

手教詢及家叔病狀初五日接家信先叔於正月十九戌刻棄  
世自八年十一月聞溫甫舍弟之耗卽病不能言去歲雖能言

而病已深矣例載部院衙門有期服者給假二十一日內廷人買則給假十四日軍營雖無期服之例鄙意欲稍盡哀忱擬成服十四日前得太湖克復之信已專人歸告九舍弟四月方來亦因家叔病危也春霆義渠事昨已詳復逸亭信做處亦有一分此時應請以金余蔣吳并力桐城朱雲崖軍尙須稍緩乃能前進也逸亭信地勢極熟主意極穩侍憂皇不暇遽復求公條復之

### 覆胡宮保

一四路之兵初議侍占一路公處撫一路湘一路鮑一路自蕭張不來而侍處不足成一路矣自余吳分散希菴未至而撫

湘兩路併爲一路矣此四路變爲兩之說也惟鮑公添至六千人又操練馬隊實足獨當一面與多公分道揚鏢又可分爲三路止須酌撥幾營與多酌撥幾營與鮑耳

一敝處各營除遣屈守平江營仍回湖口張子衡二營因病撒散外尙存九千餘人兵力非不厚柰之統將以情以勢本可令雪崖與蔣合爲一路外間議蔣戰則取巧敗則議過此間各營頗不願歸其節制專令朱李赴安慶侍又不放心也止好待沅甫還營多鮑假滿再議所向

一舍李洪弟旣已受事自不宜遽行回籍今旣已具稟應候批遵行沅甫舍弟定於葬叔後來營約在閏三月侍於今日移城

內公館略申禮意

與王子菴

數年以來常思與足下一見關山修阻會合無緣尊府近況何  
似如能遠遊四方則請速惠復音敝處飛咨曾卓如制軍調足  
下來敝營襄辦軍務如有不避艱險爲足下所深知願從軍者  
亦可邀以同來

覆胡宮保

一鮑春霆來此小住一日已回本營侍已與之商訂調閣下准  
其告假三月由皖還粵程途一月在家停住二十日奉母攜眷  
而出或住漢口或住華陽鎮舟次按限卽還陸營閣下慮其爲

四川所聖鮑意待渠起程一月之後此閒再行入奏在職僅二十日必不至爲蜀所留但求閣下奏明回籍省親字樣以爲光寵云云想仁人亦必允許渠又欲往英山稟辭侍力阻其不必再往旣已准假卽須快去快來

一霆字五營渠意欲紮二郎河公意欲令其紮天堂或至英山護衛鄙意擬令紫潛山縣爲桐城安慶後路之聲援蓋前敵旣進安慶桐舒等處則大霧亦宜少進乃可調度諸路之師或進天堂或進潛山由公自爲斟酌公旣不久駐英山則霆營可不必紮入山中矣請裁定速示春霆以便渠料理起行

一敝部各營煩思速進安慶除遣回湖口二營撤散二營外計



問二千餘護老營以七十人攻安慶耳就近可調者擬調營標趙朱李楊四營湘恆二營桐城得金蔣余萬五千人進攻安慶得萬人進攻似可兩全此六營是否可調祈酌示

一安桐進兵則霍山不可無防兵吳幹臣前有五營尙嫌其少今何僅八百人耶吳幹臣資望尙淺將來可獨當一面目下斷不可遽統他營應請閣下派吳隸何軍統之若派助敵處殊可不必一則人數太少一則往返太勞也霍山須防兵三千或派會亭軍或派他營祈酌示

一多公統萬人鮑公統八千均可勝任鮑軍須假旋後乃可徐議所向多公須進舒城一路乃足以展騎兵之長俟渠一月假

湖卽當請其北發與桐城一軍收犄角之效略陳芻蕘伏希酌  
察

致胡宮保

再者昨信請撥督標趙朱李楊四營係就近處言之并非恆心  
貴富之筆尊臧中有以趙朱楊撥隸多部李營撤遣之意如已  
定主見不必因侍信而改易也但求設法撥二千人助敝處或  
赴安慶或留老營護衛而換敝處護衛之營攻安慶皆可  
兵事與地方相表裏欲得一爲守兼優者爲懷甯縣令以佐雨  
亭之不逮閣下夾袋中有其人乎介唐如果南歸尙須擇一賢  
者爲潛山縣庶根本稍固乃可圖進取

選營再添二千人尙未接奉公牘令其招訓營常勇乎抑令至  
長沙另招乎如令招常勇卽須趕緊札行

多公雖有統萬人之才但得七八千人儘足自營一面若必取  
盈恐不敷調撥鮑公則得六千二百人已隱然巨鎮矣

### 覆胡宮保

手教敬悉多都不能湊足萬人侍亦熟籌及之意欲將多公馬  
步全作游擊之師專打援賊如目前兩軍進圍桐懷則多公紮  
青草壩桐懷則赴桐懷警則赴懷將來鮑軍進圍舒桐則多公  
紮大關以爲游擊也可以爲應變也可以爲顧鄂疆之師也亦  
可始終不圖城常

可置空靈之處

如是則可多可少閣下調撥不甚窘矣

致唐鏡海先生

國藩近常與吳竹如通信渠在山東布政使任內因錢糧征款  
部議降調 皇上特恩改爲直隸臬司竇蘭泉寄居四川常與  
伍松生諸人講學妾生一子其妾旋沒良峯前輩仍官盛京侍  
邸其子福成以拔貢 朝考得河南知縣數年升同知現以捐  
升得補蕪湖道丹畦遇難在英山縣今該處漸就肅清國藩擬  
爲文立碑於英山以誌丹畦之孤忠附告以慰拳注

覆胡宮保

手教二恆二禮營撥歸敝處公牘亦到靈營不宜撥隸敝處本  
日已詳復矣揆帥信并另件閱悉不忌不足以爲驍將不妬不

足以爲美人無足怪也。在下則護翼之等夷則排擠之爲將常態亦無足怪也。止難爲閣下調撥耳。

### 覆官中堂

奉手教具審一切太湖潛山分爲兩案出奏尤爲分明。比聞鳳陽府縣兩城克復袁翁兩帥之軍或可與楚師漸相聯絡江淮之間大有轉機。尤足上慰宸廑。惟南岸警報頻聞自涇縣旌德陷後太平績溪甯國相繼不守。徽浙震動金陵方在得手之時。恐不能不因此而少分兵力耳。浚川一軍不知可折回出江。沂峽入蜀否。國藩發前信後又會潤帥銜飛札一次并加函切致計在常德可以接到。若竟不折回而由黔入川則蜀中有緩

不濟急之虞而浚川亦有險遠貧苦之患殊深懸系倣處報銷粗已就緒已飭李筱泉太守賞呈鈞鑒

覆胡宮保

選營宜爲尊處護衛或駐天堂或駐他處宜守而不宜戰眾論皆然想籌辦亦不越是矣靈軍之營哨弁勇長沙省城人居多樸者頗少而能屢拒大敵兵事誠不可以一律相繩乎左公自襄迴車似不如速行速歸爲妥流波碰一帶本不可以無兵然鮑公未還營之先靈軍總以在閣下身邊爲妥北路如果吃重似仍須多公馳援也

覆胡宮保

兩次手教敬悉。伍生所論。侍每覺其切於事理。以大局論之。四  
眼狗目下必赴下游。救援金陵。或從浦六往援。或從甯太往援。  
雖未可知。而要之必一東竄。不暇遽犯霍六。袁翁方在得手之  
際。擒匪亦必舍其老巢而謀南犯。拙見如此。未敢昌言也。

### 覆彭雪琴

本日得淡翁來咨。奏請鄙人赴浙。惟廣德州及浙之安吉業已  
失守。距杭州不過二百里。距湖州則更近。楚軍縱能往援。亦已  
緩不濟急。況敵處兵單。又無統將。難當大敵。尤閣下所深知也。  
淡翁之賢。不可不謀。所以救之已。飛函往商。潤公矣。蕭輔臣樸  
實諳練。淡翁指名札調。似不可不令其入浙一行。韋志浚部下

向無紀律難免擾民斷非三令五申所能改恐壞楚軍之名且  
恐壞閣下及蕭輔臣之名決以不帶爲妥唐義渠新撤之常甯  
勇膽技俱優若輔臣迅速就募四五營不難立就營官哨官軍  
裝帳房無一不全不過十日即可成軍勝於韋部萬倍卽抵浙  
後尚可爲上等勁旅義渠兄與淡翁亦係至交閣下與之婉商  
而潤之宮保主持一切當可成事僕目疾尙未全愈二十日仍  
回營盤知注并聞

致胡宮保

昨接雪琴信知浙事危急淡帥調蕭翰慶入浙本日接淡帥咨  
知廣德安吉次第失守奏請鄙人援浙淡帥之賢不可不思所



以援之目下招集訓營之勇尙易集事雪琴欲以韋志浚部下  
援浙非徒無益恐又害之

覆胡宮保

承示俟命錄粗讀一過其佳者公已圈出而時事所在局外人  
與局中者究有別也霆營究以護公左右爲妥公在英山霆亦  
英山公居天堂霆亦天堂此軍若非春霆在營恐不足當大敵  
侍公之側壯聲靈不採之威千妥萬妥惟希俯納成得升之怯  
此閒亦有所聞之純昨指名稟參似當有以嚴懲之否則爲統  
領者號令不行矣之純雖未必服人之心然不奉令而拔營則  
咎不在之純也溶川之才氣亦非雲崖所能轄所謂營難不能

伏鶴卵也桐城如有大股援賊多公或可就近援應舒公馬隊  
應否番防北路聊進一說以備參酌成大吉之勇侍亦有所聞  
浙事大壞淡公來信不忍卒讀抄呈一閱

覆胡宮保

淡公危急侍昨信已詳之侍恐蕭翰慶不能帶華部而公以爲  
可行蓋倉卒之間舍此別無可調也止得令此起先行以濟淡  
公之眉急而助浙江之聲援其應需鍋帳侍已札行武穴分局  
李宗涑矣惟此起義勇太不中用且恐其擾累民間有損無益  
來示稱另籌二三千人應請早爲速籌或如侍昨說募常甯勇  
或另行召募必稍勝於韋部者乃不虛此一援皖南失六城浙

西失三城江北失清江浦潁州府公豈尙未盡聞耶

覆胡宮保

希菴業已到營極慰極欣淡公寄尊處信讀悉請韋縱令速行亦恐非閏三月所能到不知趕得及否以六年二月江西情刑言之更基於此時之浙江十倍厥後省城亦竟無恙成敗天也豈人之所能爲哉昨接大咨多公尙請病假渠軍若不能爲游擊之師則雲崖申夫侍亦不敢令其赴安慶矣不知多公所不滿意者安在以鮑公不應回籍耶不應於奏中贊鮑堅守之功耶敝處禮節有未謹耶多公旣請假目下拈狗逆來犯渠未必有當前敵似當謀所以禦賊之法請與希公從長計議

裴彭雪琴

蕭輔臣既在下游經理韋部事宜則不能赴鄂中親招訓勇僕  
昨已專託義渠矣閣下更當加緘託之輔臣帶五千人似宜以  
訓營爲腹心韋部爲手足輔臣料理韋部妥協後仍宜單舸親  
赴上游迎接訓營或至黃州或至漢口得與義渠一面更好潤  
帥之意欲再籌五千人援浙計浙中如有不幸則三月可危如  
三月無變則閏月以後可無大礙輔臣既不能於三月趕到則  
須料理周妥不可太草率也

覆胡宮保

一浙江之事二三兩月可大分曉淡公二十三日咨文賊蹤去

省城僅五十里果直偪城則已十日矣省城之能守與否斷非此間援師所能爲力吾輩所最關切者土則杭城根本也人則淡公君子也若此半月間杭城無恙信息稍舒然後謀所以援之之法若杭城有大變則東南局勢迴殊又當從長計較

一侍目疾常發精力日疲部下無一統將兵亦太少倚傍台旃尙可藏拙他處實無能爲役外省情形督撫之外另有客帥則司道猜嫌州縣侮慢以是爲逢迎本帥之資頗不易處應否赴浙尙求希韞與我公代爲裁酌

一蕭翰慶須在安慶經理韋部事宜不能赴鄂親招訓勇尙求閣下緘託義渠代辦經理

一閱揆帥信鄭事尙未決裂可喜可慰莊嚴尙能守正揆帥亦  
軒爽坦白鄂事或尙可支公於吏事不宜放鬆風氣之所係與  
兵事息息相關也

一希菴遠剿近守之說最精大約一二路遠剿三四路近守也  
覆胡宮保

昨夕熟商進兵事宜希菴之意以敝部團懷甯多公圍桐城希  
統各營暫紮青草壩爲懷桐援應俟懷桐紮穩後再議所向余  
際昌調守霍山爲第三路防兵靈營調兩路口等處爲第四路  
防兵如此布置待覺甚妥是否有當仍候尊裁若果如此布置  
則敝處護衛無須另添千人矣以第一二路爲遠剿以第三四

路爲近守大局已定惟第四路究以何處爲最近何處爲扼要  
仍祈酌裁

覆胡宮保

淡公賢者斷無不殉節之理但不知少邨護家眷以出否耳公  
之身不特爲南數省所倚賴亦爲吾黨所宗仰似不宜過於憂  
傷久無寄諭來楚想因清江浦失守之後江浙奏報不通淡  
公十一十五兩次奏報必皆未到京也杭城旣失若能保得甯  
紹台三府事尙可爲浙東無一兵四眼狗又已南渡恐甯紹蘇  
常皆可危耳

覆彭雪琴

義渠已到湖口不知與閣下會合否蕭守才力如果不甚開展  
恐不能統六千人之多則閣下當早爲之計或另一人統三千  
免其竭蹶亦所以保全之也統領之才千難萬難目前麾下人  
才恐亦無遠勝蕭守者但浙江未失以前則以速去爲是浙江  
既失則必須千妥萬當乃可放心遣之前往茲彼中無主人翁  
也

覆胡宮保

頃接賜書知玉體違和服藥無春夏氣至爲懸系如服仲遠兄  
方二三日不大愈侍當至英山奉謁兼可密論時局嚴公緘中  
所稱王石臣觀察信未蒙寄來侍急思聞蜀事尙望寄示季公



來營可以鬯敘一切希厚雪等處計皆有攀留之意雪堂之返  
公有意否爲保身計似不能不尋一大廈少住也

### 與官中堂

胡宮保自聞杭城被圍之信愁病交侵寢食俱廢加以蜀事日  
壞尤用焦灼既非所以爲養身之道卽處事亦閒有思慮過當  
之處必須離營擇一靜處調養庶心血不過虧損國藩目疾如  
故寫字不過三行卽須停筆少息亦苦不能靜攝也

### 與李申夫

馬隊私設公款分攤是一良法請卽試行派人買草料每日分  
散各哨勇閤下去年所定亦一良法也至今總未行得出立法

不難行法爲難以後總求實實行之且常常行之請從公攤及發料二事始應事接物時須從人情物理中之極粗極淺處著眼莫從深處細處看

贈胡宮保

惠書敬悉尊恙漸愈至以爲慰進兵之略鄙意欲仍守希麓前議以朱李延安慶多公進桐城希軍紮青草壩不知尊意有更改否季公卽日至英山請其一決韋軍殊難位置張筱帥有咨來止亦未可令其隸皖也

致左季高

聞辟地東來想已安抵英山今春雨雪風寒目所罕見惟興居

安適調衛無營爲頌此閒本擬二月進兵旋以浙江之變紛紛  
易計今浙事大定究應如何分枝前進望鴻裁與潤帥酌定懷  
桐之賊儲積百物甚富亮係久頓堅城之局然亦不能不進圍  
也台旆在英山約住幾時此閒卽派夫役奉迓敝處與希菴處  
均可小住楊彭處尤可勾留江湖空闊足遣壯懷耳

覆胡宮保

季公已到英山侍今早已專丁持緘奉迓矣尊恙大愈極慰前  
日信稱淡公尙存云云係詭詞以安公之心因羅忠懷來具述  
卜者之言浙江必克淡公必遇救得生云云侍因將卜者之繇  
詞裝點作家書之實語以寬公懷本日得張筱翁信并江南奏

稿抄呈覽少利早已出城所以遲遲未到宿松者當以折回  
杭州尋覓淡公耳蕭章既奉諭旨自無再令去浙之理彼浦  
副憲信來亦請蕭而辭章實則蕭赴皖南亦必不能出色也鄙  
意且皆謂之一月後另作計較公計何如募六百七百人說  
季公何必爲此蛇足卽以敝部萬人全請季公統之尙是蛇足  
况六百七百人乎水師中別有一種風味季公若買一舟載妻  
孥其中師范少伯而不學其居積可以教子可以避湘亦一說  
也姚惜抱詩云孤艇著書江水上百年閱世酒尊閒季公有意  
乎

覆季次青

事足至得惠緘知將有浙江之行將母而歸聞難而出進退有  
度良殷浣慰此閒自正月末克復潛太卽擬進偕安慶因浙江  
警報紛至沓來議援之舉屢易其局共派六千人甫經成行卽  
於十四日聞浙江失守之信旋又於十八日聞克復之信茲將  
寄諭一道江督奏疏一通抄呈台覽饒枚臣鎮軍此時尙在  
衢州彭鴻軒因南豐新城之失已帶五營自衢折回分駐廣信  
河口等處老中營國防湖口後又經江撫派防浮梁昇字營尙  
在撫州台從行至安仁贛溪等處計彭屈二公與李弁皆可會  
晤無難薈萃成軍惟目下浙江全境將次肅清閣下露冕之官  
則可帶兵入境則不甚相宜聞羅中丞汪方伯繆都轉均已殉

節彼中局勢一變新撫軍不知一簡放何人旌從不能繞道此  
間便中當代致胡潤帥子衡撤營後仍未痊愈曰內當回籍靜  
攝也

### 覆胡宮保

蕭守之才實不能統六千二百人今得唐協和分統訓勇雖不  
甚愜意而遠甚於蕭守之兼統也韋部三千二百人目下難以  
位置訓勇三千張篠帥欲令其逕赴徽州官欲咨送河南二  
者請公酌定一處論餉項則兩處皆不甚充而河南稍寬論調  
度則兩處俱難得此軍之力而張公君子侯尊裁定後侍即緘  
復張公也敝部太湖宿松各營已拔營前進尊脈稍遜于前自

由不能養靜之故古人謂寡言養氣寡視養神寡思養精寡處  
勝友如雲難以寡言簿書如麻難以寡視或謂寡思以資少息  
乎

與袁午橋中丞

雄師近日所克皆南北要害關鍵皖省糜爛八年民不聊生今  
得閣下總持全局而胡翁張諸公皆大君子才略又足以濟之  
揆之天理人事皖省當大有轉機惟冀長淮不再梗塞淮北鹽  
課日旺釐稅日增俾雄師不憂缺餉則大幸也弟目疾久未痊  
愈寫字至三行後輒須停筆少息幸所部人數無多照料尙易  
又得潤帥就近提挈一切庶免隕越知注附陳

與張小浦中丞

韋部赴浙之說係羅淡村中丞飛書乞援於彭雪琴觀察指調  
蕭守翰慶蕭隸雪琴麾下淡翁素識也雪琴以水營別無陸兵  
可調不得已令蕭守統韋部以應淡翁之求一面函商胡潤帥  
及倣處維時鄙人獻議募訓營新撤之勇二千援浙胡潤帥則  
兼取二說令訓營與韋部合成五千人官委胡則添募訓營爲  
三千合成六千人唐觀察新履糧道之任胡與胡無統將權合  
蕭守兼統之此鄂議援浙之原委也今浙省克復全境肅清此  
軍更無赴浙之理議撤議調尙無定局閣下欲以韋部畱江濱  
而令蕭守帶訓營入嶺內是未知蕭所統者韋部非訓營也聞



河南乞師於鄂官胡二帥將以訓營應之俟定議後再行奉聞  
致朱雲崖李申夫

一兵至安慶城下先紮一二面不求合圍其通集賢關桐城青草壩之路必須官兵占住以顧後路其通樅陽廬江之路暫留與賊令其可出可入俟兵力稍厚再圖合圍應否如此仍請雲崖親自看明定奪

一集賢關必須紮營以通糧路我軍如不敷分布雲崖箇商希帥請其派營來紮可也

一青草壩爲我軍援應之所大軍不由彼處經過須多派哨弁在青草壩來往愈熟愈好其桐城等處亦須派人看明

一米糧于藥應如何接濟須步步看清進兵安慶之期請兩公與希帥商定行之此間不遙制也

與毛寄雲

弟曰疾尚未全愈每作字三四行卽須停筆少息殊以爲苦袁午帥自縮兵符軍威大振連克鳳陽二城臨淮清江二鎮頃有使來述及缺餉之狀自正月至三月初七每名僅發銀壹兩零四分翁中丞處事機頗順亦復爲乏餉所苦二公相得甚懽又得胡潤帥水乳交融雲龍契合皖事應有轉機惟祝不甚闕餉無生它變耳羅浚翁竟殉浙江之難禍福倚伏良難預測賊入浙雖僅六日而海運已空於京城大有所損吳應昌樸實明白

於此間各弁氣習相近當可相與有成也

覆張仲遠

頃奉惠緘敬審小駐英山卽事多欣至以爲念潤帥病體自由  
思慮過度肝木未暢之故弟前有緘勸其回駐黃州覆書以謂  
無以對皖中紳民今得國能調護脈象回春應可漸次復元果  
否返旆雪堂仍視夏初之脈象何如前敵如馬隊各軍非潤帥  
在此不能範我馳驅返黃之說亦有善有不盡善求台旆畱英  
再駐二旬更當定議

覆郭意城

得塞食曰惠緘得悉二月初有書見逮洎今尙未接到此間自

正月擊退賊後本擬乘勝進兵以連月陰雨泥汚后土不能  
移營又因浙江之警袁浦之失處處搖動今浙江袁浦幸已次  
第克復而此間分道進兵或此厚而彼薄或南實而北虛調劑  
先後動多牽迂而天亦未嘗三日不雨雨未嘗不大且久至今  
分擣懷桐之師尙未能直薄城下良用悵歎蜀中滇匪本以無  
聊初起無能爲役自官兵屢挫拾我棄仗又以誘民結隊成營  
自赴賊中投効日以張大不可收拾今浚川入蜀殲此土匪理  
當游刃有餘而鹽井旣敗鄂中餉源大絀兵數日增協款盡空  
實不知何以爲繼也陳作梅至湘曾與閣下相見否潤帥因先  
壠爲水所隔不甚放心故求作梅一閱其意甚誠尙作兄歸志

勃發不願赴益陽者請閣下代爲敦勸強之一行爲荷

與彭杏南

火藥鉛彈須預備五六仗之用存留一處平日操演不可動用也軍械所用船裝赴下游恐急切不能運至陸營中間爲賊所隔耳早夜站牆曰曰操練斷不可閒勤字爲人生第一要義無論居家居官行軍皆以勤字爲本黎明早起勤字中之一端也

批朱雲崖

希帥與多公和衷此最好消息以後進兵之期均請希帥定奪吾事事放心惟護軍喻余二人專講外面好看不求切實辦事嘉字營武營官馭下不得法打仗無隊伍殊不放心將來臨陣

之際謹防此兩營誤事舉動大隊也該統領細細查察據實稟如毫無起色當立即撤散斷不姑息該統領亦不可瞻徇情面至囑

### 覆胡宮保

得惠書并京報京信等件筠仙請假回籍而邛鈔有云畱津無益豈刻詆耶既已入直似宜小住以待風波之定請假微嫌太速爾事大有轉機蕭公一到當可速了皖鄂之幸也希菴見多公後聞其相投尤以爲慰前敵數公相得益彰在後路者可以高枕無憂天下至樂孰大於是

### 覆李希菴

惠臧敬悉閣下與多公鍼芥契合皖鄂之福三軍之幸鄙人得以高枕藏拙何樂如之朱李現駐石牌一切進止聽候指示施行少村至英山聞已馳赴水次計淡村先生之靈醫日內亦至江濱矣潤帥之意淡公返葬宿松全眷寄居湘中少村則隨潤公及尊處大營可謂面面周到浙江復後餘匪竄陷建平高瀆溧陽而四眼狗亦由全椒以救金陵大營前後受敵若能將此次大波平過則金陵可於夏間克復大局旋轉於一二月內卜之四川事聞有轉機浚川入峽風勢尙順鄂餉或仍無慮乎

與楊厚菴

頃接希菴信渠於初七日至

國談兩晝夜鍼芥投契

得甚歡兩公意見相合皖鄂之福三軍之幸本定於今日進整  
集賢關一帶又爲雨風所阻敝部朱雲崖李申夫二君統轄而  
幫各營鄙人不甚放心請希菴代爲照料一切已荷允許將來  
進紮安慶尙求閣下就近照料樅陽不紮陸營總難斷絕接濟  
究竟須陸兵幾千乃紮得穩求查明詳示爲要

致張小浦中丞

浙江新克元氣未復尊處月餉尙能協解少許否杭城紳民殉  
難者尙不甚多否街市未甚殘燬否邵位西及戴醕士先生無  
恙否並乞示及一二此間進兵實太遲滯然前後皆有致遲之  
故若有天焉非人謀所能自決者國藩目光眇澀如故精力迴



異三年以前所幸皖北諸軍強半昔時同事之人足以臧拙  
中肫誠幸蒙青垂特材識未優尚望隨時訓示俾免奮越是所  
感

曾文正公書札卷三十二

覆胡宮保

得惠緘知少村將來做處大約今日可到蕭公決不能兼統  
訓軍二軍久畱於徽不惟無益恐生它變當札催其歸來也袁  
公餉事可慮之至昨接其報克全椒摺鋪張頗過優獎亦優渠  
於滁州一案全守克公科曰雖出於勢之不得已然終非正辦  
也溧陽失守做處未緘告作梅一則欲其至益陽少與勾畱一  
則告之無益適以擾其心耳

致駱籥門中丞

左季翁自領一隊之說侍勸其不必添此蛇足今已作罷論矣

渠欲親臨行陣一試膽氣將來或在希菴營中句留略久亦未  
可知袁午帥自去冬綰符以事軍威甚振惟餉項日絀朝不謀  
夕李世忠新克全椒保以提督記名一門兄弟子姪均得優獎  
管轄一方自爲一種風氣午橋一循克齋舊章終不甚愜人意  
也

### 與李申夫

聞石牌須另起屋子地方并不甚好此間又須略候羅宅靈柩  
歸來少爲照料近日勢難拔營胡潤帥亦申前說欲至羅宅弔  
奠便來一敘擬移至城內公館一住或久或蹙尙未定耳前敵  
氣勢尙壯否深爲系念推下尙能黎明卽起否不可閒斷一事

有恆則萬事皆可漸振無以爲小端而忽之至囑

致張後浦中子

羅澹翁靈槐於二十一日到宿松境其世兄赴江干迎接途次相左俟其歸來乃可扶歸鄉間肅守帶章訓兩部能在尊處少立功績以爲至幸鄙意猶慮蕭之才力不能統六千人之多又恐章訓兩部難以水乳交融不無過憂敬求台端留心察看於二者之中如有一弊則不特難以圖功且恐另生弊端則不如飭令西旋請鄂帥分別調度若二弊皆可無虞則仍留麾下多一兵自多一兵之用也

與彭杏南

到安慶城下紮營宜深溝高壘牆子以落雨不塌爲佳濠溝不必多只要深要斗有一層靠得住反勝於三四層靠不住者每早三成隊站牆子不特防賊來撲且規矩習於平日各奔勇自然人人起早人人不懶散左路六營望賢表弟與蕭孚泗作主季洪弟於戰陣之事較生不及表弟見得多辦得慣不可過於推讓反致誤事看得的掣得穩卽與信卿作主可也再緩幾日朱南桂來左路便有七營沅弟新添二哨來便有八營兵力頗厚只要臨陣不忙亂自然百戰百勝

覆胡宮保

得專兵賜書并惠宣紙羊穎敬謝敬謝樅陽已大有備似須待

懷桐兩軍紮穩後再倣迺打湖口之法出計往攻乃能得手  
目下恐未易攻若能攻得敵處必設法守之此破安慶之要著  
自宜竭力以圖但恐難遽攻得耳季公聞其大世兄有病頓動  
歸思公既有來宿之約必堅留季老在此奉候也

覆李希菴

頃接惠緘并鈔示雲崖一信及尊處覆書敬悉一切國藩前接  
雲崖信請尊處撥三千人於高橋嶺以保後路鄙見亦以爲然  
今讀來書覺尊見更爲妥善蓋貴軍紮青草塢原爲四應之活  
著若分三千人紮高橋嶺則轉呆矣不特目前不能兼顧桐城  
且將來北援商固抽此三千人以去反搖動懷甯之軍心應卽

遵照卓見無庸分撥至朱李一軍或照尊緘以八千人入駐關內三千人仍留高橋或以九千人入關二千高橋已囑雲崖申夫率商台端施行淡公忠親初二登岸初三可至渠家潤帥擬以初五六來宿松會往羅宅弔奠季公及舍九弟均俟潤帥來會後分別赴青草壩等處也

### 覆彭雪琴

專丁至接手書水師不能遽入內湖必須從陽打開方能入湖此鄙人所素知雲崖申夫諸君或未熟悉閣下與厚菴兩君須步步把穩不可因陸兵約會圖險深入致水師或吃虧仍無益於陸軍也張小浦自今年以來舉動不愜人意所奏事件前後

矛盾來緘所指各端鄙心亦不以爲然本日接渠咨又以輔丞帶訓營三千援剿常州鎮江而令韋志俊帶所部回江濱交厚菴調遣此舉尤不妥叶不知輔丞已起程赴常否曾有稟達閣下暨厚菴處否蘇州甫得安穩而賊股直趨鎮江金陵大營又形吃緊朱雲崖等擬以八千人進紮集賢關內而圍三千人紮關外九舍弟曰昨來宿松當卽赴前敵也

致胡宮保

本日侍出城八里接淡公忠櫬申刻入城明日可還鄉也接張小浦信金陵大營全陷和張退守鎮江云云大局決裂至此以後補苴愈難矣接到寄諭令都直夫帶兵赴江北公意定撥



何營交之恐賊志不在北竄而在蘇常也

覆胡宮保

得手教并官袁各緘敬悉閣下之意擬圍一城而此外皆作活兵不作呆兵季公之意則並不圍一城概擇便地以紮老營而伺隙抽兵出而鵬剿鄙意謂兩說皆是也特鵬剿須得好將庶遲速遠近悉合機宜耳目下先將都公帶去之兵將派撥定局然後可議此閒以進爲防以鵬剿爲進之法至閣下行藏請來宿松面商敬辦一公館頗精潔也

覆李希菴

得惠緘知台從已至集賢關外日內想與舍弟會晤同入關看

定營基矣雲崖打仗出則向前入則殿後此一端已有可爲統領之質又有血性而不忘本有誠意而不擾民若加意培養磨鍊將來或可成大器也此時若遽撤委猶樹木方長而伐其枝葉雖未必傷根而將來重培則更難矣故鄙意欲仍而不改

### 覆胡宮保

得惠緘知台旆東來明日可捧袂矣昨夕接奉 寄諭抄呈尊覽池州未克陸軍似難遽至蕪湖蕪湖未復尤難進趨甯國若不由池州蕪湖則須由徽州涇旌以達甯國子藥糧餉俱難接濟亦殊不易應如何覆奏之法敬求鈞裁酌定季翁之事天心大轉以後或出任艱鉅或時顧桑梓進退綽綽亦足喜也

與李申夫

舍弟要閣下同紮關內必有深意存乎其間舍弟最善體貼鄙意必擇其有益於全局有益於閣下者爲之若徒有益於全局而或有少損於閣下當不冒爲也請暫與舍弟同紮關外如實覺大有不便卽來宿松面商一次胡左二公大約十八日分別各歸閣下若已進關恐不能離營遠來若未進關請酌量可離與否行之

與張小浦中丞

敝軍自蕭浚川張凱章二人分去後實已不能成軍勉強添募得萬數百人令一副將統之而舍弟照料一切不足以當大敵

今國攻安慶賴江中有楊彭之接濟左路有李希菴之援臨萬  
人而可作萬五千人之用故稍足以自立若舍此而謀他處則  
無將之師萬人而僅收六七千人之用矣待目疾未痊重以肝  
氣時發常恐實越貽戾浙江羅王兩中丞先後奏請敕部赴援  
蓋不知肅張散去無能爲役也頃奏陳梗概附告台端庶蒙明  
鑑

### 覆彭彭琴

惠誠具悉肅輔臣定計由池州出江後忽變計往援常蘇後浦  
又撥處一營出徽皆出意料之外想輔臣不願援蘇或微聞  
有以參劾之言恐嚇之者遂懼而東行耶此時蘇常大亂尙和

皆已退至許關杭嘉大震輔臣去彼無人維持餉項無着亦可  
憫也小浦近日舉動殊爲可駭頃又奏請鄙人辦皖軍務而渠  
自往蘇浙尤爲難測尊軀近稍愈否望少節勞靜攝

覆彭雪琴

惠緘具悉韋部攻破殷家匯南岸又少一賊巢良用欣忭池州  
不知能攻克否如城堅守固則令韋部退出江濱擇要駐紮不  
可再令入徽隸張小浦麾下反復簸弄七顛八倒也如徽州有  
私藏公牘儘可付之不理敝部各營進紮關內與水師相依爲  
命斷無舍此他適之理如 朝命飭援蘇常自當據實復陳目  
內無牘至警信蘇垣想已安堵矣

覆陳作梅

前接復緘敬審動履康愉敝鄉山水寒門微薄不以爲陋安之  
若素至以爲慰浙江克復私心慶幸以爲東南非常之福到  
金陵指曰可克不料東壩失守溧陽溧水相繼淪陷其時卻擬  
專緘奉布與少荃熟商以閣下春暉戀切而三千里外斷不能  
遽返珂鄉不如姑隱此惡耗待二溧克復一并緘告乃未幾而  
聞金陵大營於閏月十六日全數潰退和張二帥走保鎮江旋  
復退保丹陽又未幾而聞丹陽於二十九日失陷張帥不知下  
落和帥退至常州又聞何制軍於初五日退至蘇州無錫於初  
十日失守噩耗迭至寸心焦灼旣嘆大局瓦解之速又念閣下

將母之情正思飛緘奉告本日又接張從帥信蘇州於十三日失守東南局勢一變至此雖曰天意亦豈非人謀之不盡臧哉浙江新復之餘百物蕩盡賊若再去恐亦難保計自淮揚以南至錢塘東薄海西至安慶皆已淪爲異域此後從何處下手閣下聞此信定知寸心如焚不遑恐亦不免有吳越之行請回敝營共商公私至計書不百一

致郭意城

昨聞蘇州失守之信專緘飛告駱帥想亦入覽凱章觀察一軍請卽迅令東來若竟至江西撫州一帶聽調亦可賊旣得志於蘇恐其一面攻浙江一面擾江西若旣到江西則我湖南守東

界之兵非四五萬人不可未到江西則江西守東北界之兵不過二萬餘人已敷分布凱章若來鄙意且先令保廣信景鎮等處固江西卽所以固吾湘也尊意如以爲然則請商之簡帥行之左季翁亦於節前可抵長沙矣京漕忽斷根本大虧鄂餉日絀楚軍亦當不支天下專何日大轉乎

### 覆胡宮保

得浙撫十四日信賊未破常州而先至無錫闔門胥門錦繡之地皆逃兵所燒古所稱勿戢自焚者耶渠發信時尙未知十三日蘇州失守之信此時賊蹤恐已入杭境矣欲保湖廣必先保江西我公有何良策祈卽詳示尊處零星事件太多似須請一



好手段辦箇此心專慮大事何如

### 覆胡宮保

昨夕得惠緘并官帥緘今早又得賜緘并京信各件敬審一切都將軍撥馬步隊是大難事不與以精勁者非所以待直夫與以勁旅又恐葬送好兵好勇也且各步隊久依慈雲亦未必肯舍此它適此事雖以公之宏才亦費平章耳雲仙不知何以尚未出京各京信不甚迫切蓋不料蘇常不保東南決裂至此耳舍弟等在安慶已興功掘長壕將來進退彌難

### 與劉養素

蘇州旣破浙亦可危六七月間賊必分大股上竄江西不可不

先籌防守之法景德鎮浮梁一帶可依山險修立碉堡庶守兵百人可當五百人之用求閣下查勘其應修碉若干迅賜開示兩湖江西三省併力共保庶有濟乎

覆胡宮保

昨夕奉 寄諭飭國藩援蘇常尙不知蘇常已失又未接王雪軒兩次請援之奏計日內當又有 諭旨送至陳豹既定兩路大舉上犯江鄂我楚師似當竭五六兩箇月之力謀所以禦之若秋閒能力挫凶鋒庶此後江鄂可保而江浙可徐圖也若不力固上游而先救下游則其禍必速而烈惜無人抉明此機於九閩公意以爲何如

覆彭雪琴

狗逆大舉上犯之說深爲可慮國藩咨請三省合防抄稿呈覽若能得池州則軍駐池州可與甯國一軍通氣并可由甯國造戰船出南漪湖與外江水師兩面夾攻蕪湖南岸之事庶有轉機第恐韋部太單不能破池州耳

與毓右坪中丞

賊若以大股上犯江西必在七八兩月及今未雨綢繆猶可防患於未然一切兵力餉需皆不能不借助湖南敝處已專緘懇求駱帥迅撥勁兵越境協防江西之北界尙乞閣下於駱帥處再三緘懇加以咨商若得湖南之兵於五六兩月到齊將廣饒

兩路布置停妥俾方張之賊不能逞志於江西是閣下永無邊  
圉之患而弟得藉是爲進剿之基實吾二人之大幸也

致李希菴

國藩頃奉 簡命權制兩江現定於初十後起行過江辦理規  
模已於致胡宮保書內略陳梗概茲抄呈台覽敬求指示所撥  
之營擬帶霆字六千人禮字千人又益以朱品隆唐義訓二千  
人河溪營七百馬隊六百共成萬人舍弟安慶一軍濠壘已成  
遂不撤動惟其中抽出二營敬求閣下撥二千人填紮朱唐二  
壘不勝感荷待舍弟另招新勇到時再將貴部撥還左季公奉  
旨以四品京堂候補襄辦敝處軍務夏末當可來皖圖敘也

與張小浦中丞

侍處僅有安慶一軍以關繫淮南全局不敢撒動業經鈔奏咨達冰案此外向湖北調鮑鎮超一軍向湖南調張道運蘭一軍帶赴皖南鮑現告假旋蜀張現駐防郴桂大約侍於五月中旬南渡徽池鮑張須六七月乃能趕到此外派員回湘新招之勇亦須七月乃能取齊若仰託福威六七兩月之內賊氛不急犯徽浙不竄擾江西俾敝處新軍稍集部署稍定得與雄鷹合爲一氣或可併力以禦狂寇目下初帶散營南渡鮑公未到之先侍應蘆紫何處將來鮑張陸續到後應移何處侍欲辦蘇事應從徽甯何處入手此外尚有從入之途否敬求一一指示精力

疲極忽腐艱鉅中夜以思但增悚懼

### 覆胡宮保

惠緘敬承所示人以曹武惠相期而此或以宣歙使者自待誠爲文不稱題自當開擴規模絕去拘攣以副盛指惟其中有一二尙須辨難著用再陳詢

一安慶之不撒圍非爲破安慶計爲南北兩岸之軍全恃水師與安慶陸軍爲之聯絡論地則安慶一帶逕渡北岸比上游之石牌望江遠近迴殊論人則雪琴沅甫必竭力聯絡使侍與公無三日不通之信無片刻不達之情假令安慶撒圍另派人駐紮石牌則桐城一軍嫌其孤立在鄂仍須以五千人當石牌一

路而在侍已與北岸隔絕矣此侍甯辦事不成不肯輕撤安慶之微意也

一次青之四千人現在饒廷選處正與淳安股匪相持萬難將其勇遣行調回又屈守蟠之一千人現在景德鎮亦難迅速調來次青回平江另募三千人成軍當在六月底到浙當在七月廣信衢州浙江本是一氣侍意用次青亦不僅在廣信特就三省協防言之則注重廣信耳

一少荃赴淮揚須待三五日看新任蘇撫放何人河督放何人再議所以經理淮揚之法

梅村兄兩信前信祇速進蘇州一條難行餘九條皆可行無一

迂腐語兩月內必一一行之此信不如前信之切當而滿腔熱血噴薄紙上有此血性男子而潦倒一生天下安得不乏材哉

覆彭雪琴

一韋志銳不能攻克樅陽則宜速令渡回南岸若不回恐北岸無立足之地也請卽速渡令其紮駐建德城內東流有周營建德有韋軍散處大軍卽駐祁門北與水師及東建聯爲一片南與徽州亦可聯爲一氣賊若上犯當有以禦之

一國藩移營時坐船至黃石磯與厚菴及閣下暢敘二三日由東流建德以赴祁門其靈字等營或由建德上游逕往祁門不必至黃石磯也至糧臺輜重則用小船由饒州浮梁河以達於



祁門縣

一安慶之斜對岸有一河曰秋浦又曰張溪河卽張家灘也此河窮至源頭盡處不知尙隔祁門幾十里請派人入此河內訪查開明水陸程途見示

一大渡船百號每船應雇二人看守百船共放營官一人哨官五人俾此二百人有所管束營官哨官均請閣下派放薪水口糧若干請閣下酌定由敝處發給如有緊急渡陸兵過江無分勇夫每名出渡錢六文歸渡船收其向水營借撥漿手頭柁每日酌送五十文亦由渡船酬謝平日無事準其買渡以進零錢一切規制均請閣下議定其造船之費請厚菴與閣下整行代

出敵處必陸續歸還

一吳城新座船昨已派胡維峯去接求閣下派水手由橫壩頭送入宿松湖內僕起行時卽坐新船至黃石磯登陸後寄存尊處此次分手將來或與閣下及厚菴至蕪湖一會則幸矣

與周子佩

現在令舍第一軍仍圍安慶與楊彭水師同駐一處與胡潤帥亦相距不遠聯絡一氣國藩南渡後與張筱翁徽州之師咫尺與舍弟及胡楊彭水陸各軍仍可呼吸相通互相援應或不至大有蹉跌惟鮑鎮回蜀須六月底乃能旋營新招湖南各勇須七月乃能到齊數月之內尙不能履江蘇之境且後路不清餉

械不繼卽履其境亦豪無裨益心急如焚不能奮飛閣下將何以教我國藩才知本拙今精力憊甚忽膺此重任大懼隕越爲天下笑爲鄉里羞請閣下側聽清議如有顯然過失大拂輿情者卽祈立刻飛緘詳示如其力不能改則徐圖之若此心則決不交過而憚改也

覆胡宮保

一直夫將軍之行旣不能奏明停止似應厚爲裝遣昌營應全調去除發欠餉外應裹帶十萬兩以行侍與希菴所見略同不知鄂力能勉強辦此否  
一敝處南渡兵單凱章一軍承閣下代爲催索侍亦必隔日一

緘三日一咨催之此外新添之勇曾咨商左公惟人數已逾三萬若再添募餉項實無所出道州辰潋二支暫可不招無好統將好營官雖百鍊精勇無益也且待左公咨復到日再行商酌一次青成軍後須在廣信興沈饒會齊浙江有急次軍應由衢州援浙浙江無事應由孝豐安吉以趨廣德州

一淮揚暫無人去若侍明年能赴淮安造戰船則於淮揚有益而上下水師亦可兩頭湊合於東西梁山等處耳

覆胡宮保

承惠好懷辱軀以八年夏蒙賜珍藥稍臻壯健嗣復寵賚便蕃感何可言明公欲登萬民於仁壽而先及菲材亦惟循劉媪念

佛之故事而已接浙撫王公信蕭翰慶於四月十九日陣亡其部下先至湖州擊退賊匪彼浦來信又言訓勇潰回千餘不知何以分開七零八落也

致左季高

昨具咨奉達冰案亮蒙鑒照台從以何日抵湘至以爲念本曰擬浙江王中丞信江畏賊敗潰於平望蕭翰慶陣亡於湖州浙省守兵三千多不可恃潰兵自蘇入杭恐爲內變危如累卵等語東南大局誠不意決裂至此杭城若有不測則江西之患近在肘腋鄙意禦之於廣饒則有城可守有險可扼爲力稍易若闖入腹地則江西糜爛而湖南亦防不勝防矣敬求閣下商之

衛帥迅遣凱章一軍前來江西其凱軍與春靈雲崖三人應如  
何分布之法仍求指示郴桂防粵東之賊縱使倉卒闖入以湖  
南之力閣下之謀必可制之未若蘇浙大股竄犯江西爲害之  
烈之切也無論湖南何等警急總求夫力先派凱軍東來仍查  
照昨曰鄙咨事理次第舉行其第一條請閣下自統五千人或  
霞仙統之不知其說可行否如倉猝不能成軍或請另撥一軍  
東來相助而以新立之軍保護桑梓伏乞卓裁施行弟以十五  
日拔營至安慶一會楊彭卽由東流進赴祁門以待春靈凱章  
二人至八月間企望旆遠來不勝至禱

覆張後浦中丞

一安慶撤圍則桐城亦須撤退英霍亦須酌退卽袁翁二軍亦孤立無援淮南全局皆變關繫匪淺是以熟商仍令舍弟駐安慶不動

一侍向湖北調霆字營鮑軍六千人禮字營千人又抽安慶二千五百人合之宿松護衛之營共萬人定於十五日起行由水路赴安慶自東流登陸擬紮祁門與雄師相聯絡先固徽境並保江西之饒防

一飛調湖南張凱章一軍並另募楚勇萬人約須夏末秋初乃可陸續到江西皖南

一檄李次書新募平江勇三千人與在景鎮淳安之平江勇合

爲一二通達江浙丹房守關捕與次拘獲匪三人台辦一罪  
顧衛以保浙江之上游以防江西之東界軍機若順則由安  
吉查鹽以進黃德州

一鮑鎮告假回四川現向未來侍現帶靈營渡江尙無領將須  
在安慶略爲等候俟鮑公到後又須等候凱章鮑張俱到乃可  
分兵進剿分兵援浙目下浙江阡危棉力不能速救憂心如焚  
實深愧悚

一皖南餉絀素所深知侍爲地方官詎當分潤協濟目下添募  
甚多並無可指之餉奏請以江西地丁漕折歸中丞經收釐卡  
身帖歸侍經收覈經理得人所獲較多以餉新集之卒兼協磨



下之軍未知能上邀 俞允否辦理果得旺盛否

一職內應辦之事以海運及鹽課爲最重海運之能辦與否須視浙江之能否保全以爲斷至鹽場大利須親赴淮安辦水師戰船二三百號徧布鹽場各河改爲就場征課庶存此大利兼可南剿揚鎮西防長淮不知淮安果可興造戰船否已緘問袁午帥矣

以上各條籌畫梗概是否有當伏候惠示肅輔丞遷爾殉難深可憫惜被求設法覓其忠骸歸葬故土爲幸章營繫其所統之營訓營非其所招募所以兩次剖晰於左右者深知訓營不願肅守也

覆胡宮保

一賊雖多方誤我而大致仍不能出去年所奏四路之範圍四路中仍以第二路爲最重鄧意希禮沅三軍皆駐現駐之地不可移動賊救安慶必在桐城下手何也若從第三路下手則由霍山至英山山路崎嶇難進難退米糧難辦子藥難運前有英山雄廐城守以抵之此第三路之不易來也若從第四路入手則必先破六安州後破商城固始乃達楚境而米糧子藥亦難接濟此第四路之不易來也以愚見策之賊非萬不得已必不由第三路四路而來必以盛勢徑撲我第二路若合希禮二人之力靜以待之必可破賊萬一失算賊果從第三路來且待霍

山被陷後希軍再赴英山援救亦尙不遲賊果從第四路來且待六安商城被陷後希軍再赴羅麻援救亦尙不遲如去年打寶慶故事賊勢未定則難料賊勢已定則可乘也

一昌營撥交都將軍帶去昨已詳復矣其霍山之防應請閣下與希菴派人接手至英山護衛諸軍亦須講求城守事宜以備不虞

一天堂於萬山之中闢開平原誠爲佳境然設防於彼究屬無當卽有重兵亦不足制賊之死命賊由第二路三路犯楚皆不由天堂經過一路四路相去尤遠則其非必爭之地可知目下兵力不敷應請無庸更顧天堂待秋閒介堂重來令其率新招

二營潛山五營往防天堂

一兵多則拓地遠驚兵少則斂抑退回縮地一二百里亦無扼要可守之隘亦無可以減兵之法徒增賊之氣而我仍無把握則不如不退矣懷桐既靜守不退大縣在英山似亦不宜移動以上各條多希菴之說而鄙人贊成之其云賊非萬不得已不由第三路第四路來者則少荃之說而侍與希菴深以爲然者也伏祈采擇施行

覆胡宮保

侍於二十日自老洲頭起行夜宿華陽鎮廿一日至東流縣與陸軍料理一切再以輕舟訪楊彭也接三次手教梅村境遇可

閹俠烈可敬學問可畏其二女事侍當設法表章梅兄前一信  
欲侍出一惻恨告示茲將示稿鈔呈其第一條卽旌表忠義蓋  
倣公初克武昌時立局辦法也

覆胡宮保

連接兩次惠緘左季公事若待渠信來再定則復奏太遲若逕  
行先奏則當請其入蜀益以事勢言之則入蜀大有益於鄂鄂  
好卽可波及於吳吳好不能分潤於蜀季公之才必須獨步一  
方始展垂天之翼以奏對言之諭旨所詢獨當一面者斷無  
對曰否之理旣對曰可矣則當令其速了蜀之小事而後再謀  
吳之長局是忠於爲國謀忠於爲鄂謀忠於爲季謀三者皆

宜入蜀但不忠於謀鄙人耳淺見如此不知與尊意相合否此摺本應由侍主稿但目下侍距揆帥太遠距季公太遠實難會商敬求閣下主稿送敝處拜發仍列揆帥首銜來吳則自謀私忠入蜀則三謀公忠二者俱可侍無意必也

與馮樹堂

國藩當疲憊之餘忽膺艱鉅之任大懼隕越貽友朋羞惟廣求名將以禦寇氛廣求循吏以蘇民困得一人則鄙人可免一分之咎得十人百人則地方漸受十分百分之福以閣下治蜀爲朋輩中成效之最著者故備公牘相邀台駕速來吳越將伯之助至切至懇閣下旣已捐升離省卽不奏調亦可因賢聲久著

仍當附片奏請也

覆胡宮保

手教敬悉季公若來敝處畱駐皖南而以少荃駐淮揚則侍仍可以水師爲老營而以徽淮爲南飄北泊之所於私計誠便特蜀事恐非東公所能了季不入蜀或於兩楚均不便故仍請季公自謀自斷而公爲草奏侍繕上之此間節次庶爲不紊望公無過讓也

覆張筱浦中丞

侍至黃石磯與楊彭兩君偕敘南風大發由陸路轉回東流建德所調鮑鎮之霆字營自湖口南渡者一半餘二千人竟阻風

不能渡江鮑鎮亦無回鄂消息侍前本飭靈軍先赴祁門今旣不盡南渡則侍當先行而安慶調來之朱鎮品隆又因病不克隨從僅挈諸偏裨以行殊深焦灼幸徽境現尙靜謐雄麾足資堵砌不至遽須重兵茲足慰耳祁門難紮多營此間亦當籌及第山谷用兵較之水濱行師其難數倍侍欲率諸將經歷山險之中以重中路之勢且講求轉運事宜使楚人諳悉途徑庶此後調遣較易尊意以謂然否

覆左季高

連接賜書至忻至慰此間辦理規模具詳兩次奏報中各摺片皆已咨達冰案亮蒙荃鑒將來各軍到齊時擬以鮑春霆趨北



路沿江濱而下攻池州次青由衢嚴而趨廣德州俊臣若來亦由此路所謂南路者也凱章枚村及敝處之見兵閣下之新軍皆萃於中路徽州一帶弟與閣下會晤後各軍或分或合或南或北臨時再行商撥目下所深疑不決者 諭旨有飭閣下督辦四川軍務之意恐須旌從一行或吳或蜀敬請閣下自定至計潤公主稿而敝處繕發江西兵事餉事當遵照來示一一整飭吾鄉尙有綜核之才深穩之度可任煩劇者幾人得一焉與彼泉共治江西身釐庶事易集而民不害求物色見告

覆胡宮保

得手教知季公願共事皖南不願獨入蜀中至慰至幸季公來

皖則湖南各新軍及次高壽靈凱章等皆精神百倍幾可與公之皖北比盛侍在皖南則高臥離皖南則放心何幸如之卽日一面具摺一面緘告揆卽到祁門卽行拜發也三河尖侍未深知不知陸兵若干卽可保守若在三千人以內似屬可行侍辦淮揚水師公辦三河尖鹽務防務繫首尾相應一氣貫注之事若由蘄水抬礮入淮亦必在三河尖下水特須一枝好陸兵乃能成此異舉耳

覆左季高

潤帥寄示大緘敬悉自從願共事於皖南不欲獨入蜀中至慰至幸凱章枚村及新募各湘軍皆以遠行爲苦得閣下挈之以

行人人精神百倍卽次壽春靈亦勃勃有莫遏之氣從此皖南  
可見天曰弟若在徽甯則舒滕高臥若赴淮揚則放心遠行幸  
何如之卽日具摺復奏一面緘商官胡兩帥矣弟在祁門當堅  
守不動以待閣下之至霞公旣不肯出卽求閣下募足五千人  
成一大柱斷不可少以是爲皖南徽甯之征兵卽以是爲江西  
東北之防兵至要至要

覆胡宮保

湘勇加夫之例敵處毅然酌減尊處若肯通行希菴必不阻格

以前者不改以後者酌改於營中亦無窒礙此事迪菴所定俾本不忍改之惟目下文書太煩將來加銀太多若不趁早稍變則積重難返矣以質高明行卽緘商希杜也作梅蕭然物外而有濟世之心有牧民之才鄙意欲其迎醫湖南而作州縣於皖南江西以其早識苦行爲羣吏之表式俟其到當面懇之求公爲我先勸之

覆郭憲城

國藩於十一日到祁門縣適值甯國被圍顧救甚迫國藩以靈營未到鮑鎮尙未抵鄂朱鎮亦新病未痊未允撥兵往救且新奉寄諭有不可輕率前進宜加持重爲要之命而季公與

閣下俱以遽進爲戒不得不堅坐持重然各路之望極而怨怨極而訾不久當爲謗叢矣惟望季公早來一日則皖南早紓一日望於七月中旬成行不可再遲屆時出伏亦不甚熱也

覆鄧寅階

頃奉惠書猥以弟承乏兩江辱蒙獎借感慚交并弟菲材薄植本無遠圖加以數年在外精力極疲今全局敗壞艱鉅忽膺大懼隕越詒知已羞此座前車履蹟獲轍相尋蓋位愈高則譽言日增箴言日寡望愈重則責之者多恕之者少閣下愛我迴越恆俗望常以藥石之言相繩弟每日行事有日記一冊附家報中閣下如有不謂爲然之處卽懇逐條指示不勝銘感

覆李希菴

國藩自建德啟行十一日抵祁門縣層巖疊嶂較之湘鄉之山  
尙多四倍泉甘林茂清幽可喜每一隘口不過一哨即可堅守  
並無須多兵也惟甯國府被賊圍困呼籲求救力尙不能往援  
殊深歉仄此閒軍事其大者已將摺稿鈔達尊處小者本無足  
錄承索取日記其中瑣事太多閒有賊否人物之處未便鈔呈  
人樹梅村二函附呈渠二人皆有公牘私緘至敝處梅村牘言  
往助季翁當卽批准人樹牘言在籍修堡當批駁仍請其來營  
也渠在敝處則於尊處及各處皆能通氣不必一一親筆緘致  
求閣下再爲我緘催或心牧已疾卽請歸侍南陔俾人樹得以

出濟時艱亦屬兩全之道尙祈卓裁安慶新營太多懼不足以當長風巨浪望閣下常往察看與舍弟熟籌預計

覆官中堂

手示敬悉求治不可太速進兵不可過銳兩言謹當刻骨不止書紳初到皖南不特地方事件難遽着手卽軍務亦難過問此閒風氣與兩湖迥異欲求挽回之方難免更張之迹將來尙須逐條請示仿照尊處成法行之目下謹遵雅意必不輕言整頓二字左季高京堂不願入蜀國藩得此將伯之助可以高枕無憂已會列台銜於十六日復奏摺稿咨達冰案聞潤之宮保業經緘商相距過遠不及先行送稿伏希鑒亮

致邵位西

孫省齋觀察來敝處略詢近狀驚悉伯母大人錦堂棄養哀愕  
曷勝閣下至性純篤又值亂離之際舉目愴懷膺茲大故尤虞  
哀毀過情或損生理馳系無量國藩於四月杪奉承乏兩江之  
一命菲材疏淺大懼震越詒知己羞敝部萬人圍攻安慶關繫  
淮南之全局卽規復金陵之張本未敢輕率撤退畱舍弟在彼  
統之而另調鄂兵萬人率以南渡已於十一日馳抵祁門縣暨  
聯徽甯二郡之聲援而保江右東北之門戶仍派人回湘調募  
二萬人悉赴皖南俟秋閒取齊擬分三路進兵北路由池州以  
規蕪湖中路由甯國以規東壩南路先赴廣德或由湖州以趨



太湖之東或出宜興併趨湖西屆時再行商酌辦理惟幕府一二賢者均已散布他處分治一方欲得高手代爲草奏殊難其選不揣鄙薄欲屈老兄枉過其大者匡拂咎舊餘技則代作章奏內外交益冀幸何極

覆張筱浦中丞

餘杭復失浙江危急甯國日棘不特大局愈壞卽國藩之私計亦更無從下手曷勝憂憤來示囑侍軍由黔而石而太步步爲營鄙見如此辦法實與甯國無干斷不足解甯國之圍必不得已則不如仍遵閔下前緘之計前此三奉惠緘飭敝軍代守徽郡台駕親往援甯等語請卽調尊麾全部迅援甯國大轅今日

啟行敝部次曰卽入徽城不敢爽約聞養素言徽郡城樓櫓不完守具不備應須若干人始敷守禦求指示國藩戊午再出諭旨飭統蕭張二軍去秋概調赴他省閣下所知也去冬勉湊萬人依傍鄂省各軍今又畱攻安慶亦閣下所知也目下所帶霆營六千人內三千四百繫多年老勇其二千六百則繫今夏新招未曾見仗其朱鎮等之四千人老勇一千三百新招二千七百故鮑鎮未來朱鎮未痊萬不可以言戰實屬自知甚明自度甚審若自揣兵力可恃豈有不願出仗之理豈有不冒赴援之理故自五月初三以後四次具奏皆言駐紮祁門以待新軍之至此中空虛之苦情雖未盡形諸奏牘已託養素告諸左右

矣倘不自量其虛弱或蹈蕭翰慶彭斯舉之覆轍則新軍雖至無所附麗亦有心人所不願出此也

### 覆郭意城

長公雲仙親家比已抵家否所懷本多不適又值盛夏南風沿途阻滯知彌愴恨也長公辦事與鄙人昔年之鹵莽而耕滅裂而耘約略相同其橫被口語幾難自明也亦同 聖主之若有意若無意也又同已寓書霞仙邀長公至鄉逍遙散遣秋冬再謀東來會合想尊意亦謂然矣協防江西之兵承已招募五千人甚好甚好萬不可撤請酌量兵力將材若宜於南路則令防守南贛一帶宜於北路則令助勦徽甯一帶聞老湘營陸續已

到袁州凱章亦將次抵袁毓中丞因仁化樂昌之失言頗震動  
咨請截留凱章暫駐袁州此間甯國危在旦夕於潛昌化之賊  
逼近杭州日盼春霆凱章二人前來望眼欲穿豈宜更被截停  
而吉安膏腴湖南江西二省所必守之區又不敢竟催凱軍來  
皖如扶醉漢如坐破舟焦灼萬狀求閣下商之簡帥季帥如吉  
安危急自不得不畱凱章暫顧南路否則或以來示之五千人  
者防南或另籌一枝防南總求早令凱章得達皖境維持大局  
至要至感

覆楊厚菴

安慶共定合圍之議桐城樅陽俱有防軍青草壩又有游兵安

慶本萬無一失經卓見裁定自無疑義惟對岸須紮千人斷鄉  
官之接濟東流周游擊一營應請閣下札調卽赴下游駐安慶  
之對岸尙欠一營目下無可調撥且俟八九月湘中新軍到後  
再酌如孤營不宜先往或東流周軍蹙且緩調聽候鴻裁吳李  
二鎮業經起旋下駛否銀兩火藥想早經閣下交妥至今未據  
報起程日期殊不可解請閣下與雪琴嚴密防範民船與坐船  
太多最易誤事請閣下與雪琴認真清釐一次所有家眷各船  
或送回長沙或概送十八號漢口等處民船坐船愈少愈好免  
致臨小事而倉皇失措也

致邵位西

前寄呈一函恭唁孝履不知何日可達國藩自抵祁門已逾廿  
日所部萬人中惟四千七百人繫久戰之士餘皆新募之卒未  
曾見仗江水盛漲封峽舟不得行鮑鎮軍登舟逾月至今無抵  
鄂消息張凱章觀察一軍又爲江撫咨請袁州此間甯國望援  
極切不克分撥一旅就近拯救實深歉仄時事彌艱責望彌重  
精力彌憊友助彌寡幕中諸友分散各處各羈職守不能還聚  
特專弁二人奉迓敬求不我遐棄翩然西來爲我經理奏疏事  
件俾弟得以全力綜核營務兼籌餉項不至竄越詒譏亦故人  
夙所期於不肖者也

覆胡宮保

甯國被圍曰緊我無退志前已協銀五千曰內又當以五千濟之甯國之存亡關係侍之全局至切至要斷無不思救援之理惟鮑張不到何可言戰卽鮑至而張不至猶慮其孤也

與胡宮保

晉軍曰內大有奇文想已漸達尊聽侍佯爲不知徐觀其變目下不能調赴安慶之對岸此外別無可調之營待鮑張到後再酌季公軍營人才畢集皖南實大有爲之地將來必有可觀但須帶一二循吏來細觀今日局勢若不從吏治人心上痛下工夫滌腸盪胃斷無挽回之理

致駱甯門中丞

曰來未得湘中確信不知南路賊果犯桂陽否郴界平安否劉  
璽臣軍駐何處昨咨商越境防剿亦須湘省本境無事乃可耘  
人之田至系念也此間前以於潛昌化之失浙卽請援又以甯  
國郡城之困張周請援兩處關係至大無以應之極深焦灼聞  
賊偏杭州省垣旋即引退又聞甯國大獲勝仗蹋破賊營八座  
郡圍似可卽解惟甯國兩軍餉習太深積欠太多竟有不可爬  
梳之勢敬求老前輩惠濟協餉五萬兩卽日起解於八九兩月  
到皖感禱無既皖南四府一州土地富饒民情純厚可戰可守  
但求甯國不失東壩克復吏事軍事得左季翁悉心經理必可  
日臻富強爲恢復金陵之本惟目前若無巨款則實有決裂之



患

覆李筱荃

鑒金目下缺乏一由五六等月向係商賈減歇之月一由南顧  
衢嚴有警生意停歇九月以後必有可觀目下總以求才爲第  
一義僕已緘託各處薦人如有來者祈閣下優加禮貌先給薪  
水徐察其才之大小而位置之前緘所陳取之欲廣用之欲慎  
及有操守而無官氣多條理而少大言等語尙乞時時畱心中  
丞待我甚厚吾輩辦事須作一家人看待凡與戶部及鄰省關  
涉餉項大費唇舌者僕當分任其怨儘可會咨會奏撫署添設  
護兵一節閣下與黼堂兄務當懇懇成之

致袁午橋中丞

探報僞輔王楊七麻子來犯甯國僞忠王李壽成往撲上海二處皆極要緊皆極可危止求淮揚不再疎失猶是不幸中之大幸弟與閣下二人應辦之事皆須淮揚無恙乃有根本也弟頃奏派李少荃觀察赴淮上辦水師并請 簡放運司實缺如蒙俞允將來少荃晉謁閣下商酌一切務求大力從中維持除貴營餉項出自鹽務者悉仍其舊外總須籌出一款大辦水師以固淮揚而保大局

覆李希菴

此間事機多不滿意雲崖雖愈怯弱之至如五六十許人春霆

甫於六月十六日自蜀起行到營尙早宋國亦患瘧疾鄭陽和傷病大發靈營六千人竟無主持之人廣德州於初四日失守甯國本被圍月餘又聞楊七麻子帶賊自池州往攻殆不可支廣甯爲皖南精華又爲進兵必爭之地竟爾坐視而不能救愧仄奚極鄙人艱鉅甫膺幾至無可措手又兼精力日疲大懼隕越詒譏當世閣下早起有恆積誠不爲人所轉移此皆進德之要鄙人恨聞道太晚閣下及此時勉爲之不特學業日新卽以軍事言之亦或可以興復舊觀敝處近日奏稿行至尊處者有不妥否求直言示知以便立改

致金竺虔

弟自奉承乏兩江之命日夜悚惕大懼隕越詎知好善惟不敢存自是之心不敢懷驚名之念習勞耐苦以冀少補鈍拙惟是時勢彌艱餉彌絀位望彌高責備彌重第年方五十而精力疲憊迥不如昔以是內增兢惕恐爲詬尤之所歸愛我如閤下其將何以策之

覆官中堂

憲臧敬審一切楚師在蜀聞已三獲勝仗滇匪應可肅清荆宜隨務不知稍有起色否國藩渡江以後皖南軍事日益頽廢急思派隊援甯剿廣而鮑鎮不來張凱章尙未到江西徒深焦灼此時皖南兵勇三萬皆極困憊獨敝處生力數千爲一髮千鈞

之繫不敢草草輕於一擲未知閣下以爲何如都直夫將軍揚  
州之行萬不可以中止第撥勁旅則鄂力實有未逮募新勇則  
直翁或非所願此中調停實難妥善弟昨復奏商帶千人前往  
到淮揚後再以楚軍之法練該處之勇摺已抄呈冰案如以爲  
可行應請閣下迅撥一旅交直翁帶以東行否則愈久而愈不  
能成行於大體實多不協弟明年馳赴淮揚亦止帶步隊千餘  
也

覆張筱浦中丞

惠書敬悉台端苦況侍所深知事權之若有若無鄰餉之百呼  
罔應將士之積疲難振及外間公牘冷淡辱沒之狀鄙人皆盡

嘗之若近日江軍門不能爲廣德一日之守及敗後不歸徽而歸浙則尤令人意緒作惡公之不能安於其位固不待覲面而得之六月中兩次奉到諭旨問可兼管皖南軍務否第二次覆奏摺與昨日見示之稿大略相同惟無一籌莫展坐視阽危等字樣計八月初可奉硃批閣下如奉旨內召則雖非成功以退而廉正之聲固爲遐邇所共亮鄙人接辦此局雖權位較崇而餉項愈絀浙江之協款難恃江西之釐金曰少徽甯舊兵三萬湖南新募三萬每月額餉三十餘萬金求十分之二而不可得每一念及終夜旁皇不知所以爲計甯國爲敵軍進兵必由之路人非至愚斷無不思救援之理無如鮑張不來宋鄭

抱病雖奏疏中強作夸大之言鎮定之象而寸心實憂灼無地  
浙中以侍未親往責望頗深其實自六月十一至今裹帶及後  
解者合計銀不滿三萬又於其中抽出萬金以協甯國公視侍  
之力量能挾此無銀之軍以行至浙中否欲辨則恐不見信不  
久當自有知者因來書開誠見示故亦披瀝以陳區區

覆單地山侍郎

再奉來書過蒙獎飾猥以遵籌全局爲有當於事理如侍之淺  
陋奚足以綜覽大局惟安慶一軍北則爲袁翁諸帥之聲援西  
則關漢黃諸郡之安危此顯而易見者是以決計不冒撤動頃  
聞北省同鄉京官深以此舉爲然高玉山以此入奏差幸中外

所見略同惟皖南刻極危急甯國被圍無兵往援坐視阡危殊深焦灼軍興過久人才日乏老前輩材者否乞惠薦一二

覆李次壽

一吳退菴事卽照來示札飭募二千五百人錄就奉達軍事是極實之事廿三史除班馬外皆文人以意爲之不知甲仗爲何物戰陣爲何事浮詞僞語隨意編造斷不可信僕於通鑑中之不可信者皆用筆識出矣退菴若以編輯廿三史成書爲治軍之藍本則門徑已差難與圖功閣下與之至交須勸之盡棄政紙專從事於點名看操查牆子諸事也



一目下衢嚴無警贛部前赴廣信請閣下仍來祁門一敘語面  
後再專人至廣信調隊由華埠以至徽州溫處道不必稟請代  
奏謝 恩若調補皖南道則當自行具摺謝 恩

覆左季高

惠緘敬悉營制極精所改俱有深意惟親兵刀矛隊內閒以小  
鎗似尚不適後幅條約微嫌其多御眾之道愈簡愈妙此閒調  
度總難妥善有復次青一信稿行徽州府一札并鈔呈尊覽如  
有不妥即乞迅速詳示恐見面時大局已定難於更換也鄙意  
廣德一路最爲喫重請閣下當之凱章輔之池州一路次重春  
筵當之甯國不失則坐守尚易次責當之甯國若失則全局大

變又當另議請公別二層迅賜裁示貴部東來亦不宜全走陸路或由袁州等處雇船至饒兩頭陸行中段水行亦足少紓士卒之力一月之食卽札台預備能否按月如數尙未可知然彼衆於閣下事必盡力也捐事現未興辦釐事用人擬仿潤帥之法多用小者少用大者以二李一沈爲主餘皆用府廳以下俊臣旣赴粵不歸卽改用吳退菴次青三日之內五次來信以百口保之南屏亦力保之究係堅卓之士或可發憤一灑前恥望助其支領口糧軍裝等項爲感

覆張筱浦中丞

惠緘敬悉此間擬分三路援甯另備公牘咨達鮑軍人數最多

勢不能不先趨后埭誠恐后埭縱能得手而爲池州青陽所牽制不能遽行前進仍無補於甯國之危張軍趨涇縣李軍趨旌德二路去甯國較近又恐人數略少難期得力再四思維未得完策姑且如此布置仍祈卓裁酌示三路米糧應如何籌辦亦祈分別示知江西六月餉銀歸敝處新糧台辦現據報三萬尙不如向來協餉五萬之多來示獎飾之語層見迭出而不知餉項一節十分竭蹶設前奏允准則新舊交替之際竟無銀兩可以點綴而彌縫之每念及此尤深焦灼龐閣部季太史兩緘接到江蘇郡縣曰在水深火熱之中大旱之望不虞之譽皆萃於鄙人之身將來望極而怨生譽過而毀來惴惴之衷良不知

所以善其後素蒙關垂向乞時賜南鍼無令途轍大迷是爲至願

覆李筱泉

一來鍼云應行增設裁併之處俟各路稟報到日參核再詳甚爲妥洽蔡少彭云矯弊更防其過驟此語極可佩也大抵欲革弊者必新章十分妥善遠勝舊章然後下手否則不可輕動一官紳參用四字兩湖業有成效江西亦宜仿照行之無疑義矣惟採訪宜多委用宜慎平日以薪水養之畱於省城札派時則必再三叮囑庶得用紳之利而去其弊一公事知而不言坐視成敗自非所宜閣下今補贛南實缺尤

不必過涉客氣凡正話實話多說幾句久之人自能亮其心卽直話亦不妨多說但不可以訐爲直尤不可背後攻人之短除此二戒外概宜知無不言言無不盡

一起票驗票并礮船費共五分餘卡不抽通省謂有不得了之日誠然誠然幸未出示從長計議猶可更改湖北章程何如通省共四分否與其異日再加不如此時不多減之爲愈也南自大庾北至湖口東自玉山西至萍鄉水路動至三千里多抽或亦無妨請通籌之此軍餉全局所關不可不慎之於始

一閣下奉 命補授贛道請在省城經理身釐章程大定後冬間再赴新任

覆李輔堂

身隨之事自下縱不甚旺不足爲慮但求經理得人秋冬必有起色用人之道官紳並重江楚並用取之欲廣用之欲慎行操守而無官氣多條理而少大言此數語者前臧曾以奉質未嘗有當與否仍祈酌示皖南之吏治釐局亦自處處需才均求隨待采薦不得以無員可保一語塞責

與毛寄雲

弟自奉帥符之命日益惴惴急思閣下來此匡扶一切俾免大戾不知尊處謝恩摺已批回否須北上引覲否如須北上應先至武昌英山一行否胡宮保好賢如緇衣以閣下之肝

膽照人計必思有以報知己第敝處諸務叢集弟治劇之才不逮胡宮保十倍欲得閣下相助爲理弟專心軍務仍不至拋荒更事乞台旆先來皖南稍有頭緒再赴皖北爲荷

致左季高

前緘言請閣下駐廣德州一路連日細思無以易此蓋由皖南以保浙規蘇惟廣德一路最爲喫重必得閣下之智勇新軍之精銳益以凱章之歷練乃可萬全無患又廣德與浙江極近瑞王二公皆不知兵勢且今日奏調明日請援次青凱章之力皆不足拒之必閣下雄鎮其閒乃能堅守便宜不畏強禦商之友朋以爲然凱章到祁門亦深以依倚台旌尺寸不離爲得

其所願用再飛函奉商可否卽如此定局祈速示次青由信州  
繞來入徽尙需時日茲札凱章由旌德援甯國霆營由涇縣援  
甯國八月初皆可拔營春霆計亦二三日可到廣德收復王中  
丞嚴劾江長貴詞旨深至恐有不測之 天威皖南軍務散漫  
敬求台旆速來經理一切自袁州至景德鎮舟行爲便已札各  
屬備船迎候矣

致宋國永

昨有札飭貴軍霆字全營由太平進攻涇縣張道老湘營由徽  
州進旌德皆所以救援甯國之急諒已接到矣茲張道定於二  
十八日自祁門拔營二十九日可至黟縣應請霆軍營務處宋



副將卽至黟縣與張觀察會晤熟商一切由徽州至甯國府有兩路東路由甯國縣西路由旌德縣由旌德至甯國亦有兩路東可走甯國縣西可走涇縣吾與張觀察面訂定由徽州至旌德候老湘營到旌德紮定二日貴靈營再進涇縣蓋旌德乃涇縣之後路也候貴靈營到涇縣紮定二日老湘營再進甯國府蓋涇縣乃府城之後路也鄙見如此此其大略耳至曲折細微則請足下與張觀察面商定後再行飛稟請示付去地圖一張查收鮑春靈十八日自武昌啟行想日內可到鄭陽和已到否并問

覆胡宮保

凱章二十四日到祁門守兩三日二十八日拔營前進由徽州  
赴旌德鮑鎮雖尚未到先令宋國永率全軍由太平進剿涇縣  
凱軍抵旌穩駐三日霆營乃進涇縣霆軍抵涇穩駐三日凱章  
乃進援甯郡用捲塘進法以互保後路也聞椒雲方伯竭力爲  
侍籌餉江西本有爲之地或可少濟季公新軍必不令其飢餓  
蓋渠與凱章皆極力訓練全恃二人以吞吳耳

### 致張凱章

現值新舊交替之際凡徽甯舊防之兵與楚湘新至之兵不免  
互相猜疑所閣下處處畱心不生衅端爲妙大約徽甯舊兵七  
月以前歸張都堂發餉八月初一以後歸敝處發餉千人以上

之整隊仍各在原處駐紮協同楚軍防剿不滿千人之零隊調回徽州依鄙人左右隨時察看整理擬於近日大張告示曉諭各軍閣下以爲妥當否

覆左季高

凱章於七月二十八日由祁門起行赴旌德春霆尙未到宋國永先率全軍由太平赴涇縣皆所以援甯國皖事甫有端緒乃嘉興一軍全數潰敗張玉良退守石門又爲賊所破杭州萬分危急請援迫切務求貴部星速前來共維大局頃已奏請略卽暫緩入蜀湖南防兵暫不抽動而老兄迅速東來另行抄咨冰案弟素性謹慎近甫當大任更爲惴惴接兄所示尙爾躊躇未

決無如浙事大壞皖南江西皆屬可危不得不竭我湘中之力  
盡救吳越非敢恃權而妄干區區微忱想同心人能亮之也

### 覆胡宮保

接兩次惠緘怪郵驛之遲也頃自祁門至東流三百里已改設  
步撥矣留駱帥暫不入蜀之奏待向極謹慎本不敢爲此冒昧  
之請無奈浙江危在旦夕江西皖南亦危在數月不得不留駱  
帥兼轄湖南防兵竭湘人之力以謀江西謀皖蘇非敢因甫  
當大任而遲放肆也公意以爲然否默觀天下大局萬難挽回  
特與公之力所能勉者引用一班正人培養幾個好官以爲種  
子而感豐四年寄公緘中種火之說也

覆駱中丞

嘉興師潰浙江危急請援之文一日數至不得已奏請大旆暫  
緩入蜀湖南防兵暫不抽動俾左季翁得以壹意來皖業經咨  
達冰案侍於此等大處向極謹慎不敢圖昧瀆奏况閣下入蜀  
當暫兼圻尤不應率爾攀留屈台旌於敝省特因浙事危在旦  
夕左季翁若不東來則侍明年斷不能爲淮揚之行又湖南防  
兵一經抽動大枝恐湘省有警則鄂皖軍士各懷歸心上年侍  
在撫州凱鈴朱唐谷營無人不思歸也是以不及與閣下臆  
圖昧奏留伏希亮鑒暫緩西行并須催季翁速來共維大局其  
五千協兵二成協餉之說仍求俯賜垂允

覆李希範

此間自凱章到營卽令其由旌德援甯春霆未到亦令宋將先  
攻涇縣以援甯國不料甫經成行卽聞嘉興師潰之信浙江危  
急萬分請援之文一日三至國藩以張鮑軍出斷不能失信於  
甯國而改援浙江是以忽置不顧知我罪我聽之而已惟是浙  
江萬一不虞則皖南江西皆危而吾湘亦難安枕不得已奏請  
駱公暫緩入蜀湖南防兵暫不抽動俾左公得以迅速東來國  
藩向以謹愼令甫當大任豈敢恃權而冒昧陳奏此次畱駱之  
奏實爲江楚大局起見且蜀中崇曹當道駱公若去一國三公  
亦必難展布也方今天下大亂人人皆懷苟且之心出範圍之

外無過而問焉者吾輩當自立準繩自爲守之并約同志者共守之無使吾心之賊破吾心之牆子閣下以爲何如

覆毓右坪中丞

頃接大咨知戶部議前事閣下望於吏議幸賴聖明鑒察改爲簡任君恩之高厚可賀時事之艱難可悚勇數清冊自應飭局迅速造報惟銀項應奏應題者須倍加慎重以少奏爲是或掣列敝衙先行寄稿商商定妥再行拜發或稱江浙向以全力供給向帥和帥大營今江西以全力供曾某大營云云或少免於大農之駁詰方今京師窮絀北五省無可搜括宵旰憂勞弟與閣下受恩深重斷不肖喪盡天良置京儲與鄰

餉於不顧無禁此際江西之力除身釐全歸做處外實屬竭蹶之至現在本省欠餉過多岌岌乎有譙瀆之虞弟昨於三省會防咨內已略言之卽當另行陳奏冀 聖人俯鑒江西之苦艱章已自徽起行霆營近可抵太平次青今日可抵祁門并聞

覆張筱浦中丞

接奉 恩緘霆營紮定乃可抽調尊示至當愚竊遵辦援浙應帶三四十人亦卽遵辦惟近日軍情迥有難處往往藉詞逗延不進此次赴浙縱不能迅達杭州亦必速至嚴州若下札出咨後而展轉遲延在浙江則爲口惠而實不至在做處則爲初接而令不行自難寬容侍於徽軍之情未甚深懇求閣下再加體察



決其必可速行者見示卽行照單下札侍前奏不顧浙江今杭州危如累卵苟力能稍裕又當別論且嚴州乃徽之門戶也惟挑選勁旅體察軍情必求確示昨聞天津敗挫僧邸退通州之信憂憤彌日是以奉答稍遲